

TINXAKA TINHARHU

TA VAPFUMERI

 A hi korhamiseni tinhloko ta hina. Loko ha ha korhamisile tinhloko ta hina, na timbilu ta hina, ndza tivutisa leswaku i vangani lava va nga tsakelaka ku tsundzukiwa eka xikhongelo, mi ta yimisa mavoko ya n'wina, mi ku, "Hosi, ndzi tsundzuke, O Hosi." Ku na swikombelo swotala swinene lahawani, swidukwana leswi nga ehenhla ka desika.

² Tatana wa le Matilweni loyi a rhandzekaka, hi hlengeletanile nakambe madyambu lawa ehansi ka lwangu leri, laha U nga hlangana na hina minkarhi yotala, nakona u kombisile rirhandzu ra Wena eka hina; tani hi loko hi ringeta hi tindlela ta hina to titsongahata ku kombisa rirhandzu na ku khensa ka hina eka Wena, eka leswi U nga hi endlela swona. Kutani vusiku lebyi hi ta nakambe, Hosi, tani hi vanhu lava pfumalaka, hikuva hi tshama hi ri karhi hi Ku pfumala. Nakona ntsena loko ha hari kwala misaveni, ha swi tiva leswaku sweswo ku tava ku rila, hikuva hi le nyimpini. Nakona hi... Nyimpi yi le ku leveni, na swona U tshembhisile na ku vula hilaha nala a nga ta kotisa nghala leyи bongaka. U ntshuxiwile exikarhi ka vanhu, nakona ha swi vona hinkwako-nkwako, ku kotisa nghala leyи dumadumaka leyи kavatlulaka lava yi va kumaka, hikuva ya swi tiva leswaku nkarhi wa yona wu komile. Kambe hi na—hi na e—e Tatana loyi a hlayiska swiciwani swa Yena, na swona hi tsutsumela eka Wena ni swikombelo swa hina, vusiku lebyi, Hosi. Ha khongela leswaku U ta hi nyika swona.

³ Kutani swidukwana leswi tlhandlekiweke lahawani, Tatana, swi vula leswaku kuna vanhu lava vabyaka kun'wana etikwени, nakona lava nga eku huweeleni na ku lava Wena, na ku pfumela eka Wena, kuva va tirhisa ripfumelo ra vona lahawani ku rhumela swidukwana leswi. Xikwembu, hi nyike leswaku un'wana na un'wana wa vona a horisiwa.

⁴ Ha ma vona matimba ma Wena lamakulu, Hosi, ntsena eka xinkadyana lexi nga hundza le kamareni liya, u tlheriserile miehleketo leyи hetisekeke eka mufana loyi a lahlekile. Ha ma vona matimba ma Wena lamakulu, nkarhi na nkarhi, ma ri karhi ma susa vuvabyi na ku paluxa xihundla xa le mbilwini, na ku kombeta vanhu, na ku va veka eka ntshamiseko. Ha Ku khensa, Hosi Xikwembu, hikuva sweswo swi le henhla ka munhu wihi na wihi. Sweswo swi le henhla ka xin'wana na xin'wana lexi un'wana na un'wana wa hina a nga ta swi tiva, hilaha U nga paluxaka xivangelo xa kona, na leswi xi nga swi endla, na hilaha

xi nga xiswona. Sweswo hi Wena, Tatana. Nakona ha swi tiva, leswaku, "Rito ri kambisisa mbilu, na kuva tani hi Muvonisisi wa mianakanyo na makungu ya mbilu," swingaleswi ha Ku khensa hikwalaho ka leswi.

⁵ Kutani sweswi, Hosi, hi pfumela leswaku vanhu sweswi, loko va ha korhamisile tinhloko ta vona, va le ku ehleketeni hi swilo leswi, na swona i Moya lowo Kwetsima lowu nga ku vulavuleni na vona. Nakona pfumelela leswaku xin'wana na xin'wana xa swikombelo swa vona swi hlamuriwa. Ponisa lava va ponisekaka, Hosi, vusiku lebyi. Lava va lahlekeke, ingaku va nga nghena endzeni va ta ponisiwa.

⁶ Hi khensa swinene kuva hi vona leyikulu, nhulu leyikulu ya swiambalo swo tsakama lahaya, hi ri karhi hi swi tiva leswaku sirha ri pfuriwile; nakona swidyoho swa mukhalabya swi lahliwile, eka votala va vona. Kutani ndzi khensa Wena eka swona, Tatana. Nakona ingaku va nga famba eka vuntshwa bya Vutomi, masiko hinkwawo ya vona. Hi Vito ra Yesu Kreste, ha swi kombela. Amen.

⁷ Hosi yi mi katekisa, yi mi pfumelela kuva swikombelo leswi a mi ri na swona etimbilwini ta n'wina swi hlamuriwa.

⁸ Sweswi, ndzi pfumela leswaku Billy u vurile leswaku Makwerhu Wheeler u na xihlangi. A kuri swona sweswo xana? Xana ndzi endlile xihoxo lahaya, kuva a katekisiwa, kumbe nchumu wun'wana, kumbe ku katekisiwa. [Makwerhu Neville a ku, "Ndzi pfumela leswaku a kuri na swihlangi swinharhu kumbe mune."—Muhleri.] Swi lulamile. Loko mi tsakela ku swi tisa haleni sweswi, hi nga tsaka; loko vakulukumba va nga ta haleni, va ta tlhandleka mavoko ehenhla ka vanakulorhi lavantsongo, eka ntirho wa ku katekisa. Nakona hi ta ringeta ku komisa. Kutani hi lava vanakulorhi lavantsongo, lava va lavaka ku ta eka Hosi Yesu, va lava ku tisa maribye ya vona—vona ya nkoka lawa Xikwembu xi nga va nyika wona. Hi tshamela ro ringeta ku endla ndlela eka vona, hikuva a hi swi tivi leswaku mundzuku u khomile yini.

⁹ Manana wa mina a tshamela ku ndzi byela, "U nga siyeli, mundzuku, leswi nga endliwaka namuntlha." Hi swona sweswo, hikuva a wu swi tivi leswaku mundzuku u khomile yini, kambe ha n'wi tiva Loyi a nga khoma mundzuku. Xexo hi xona xiphemu-nkulu. Ha n'wi tiva Loyi a nga khoma mundzuku.

¹⁰ Makwerhu Wheeler, Hosi Xikwembu a yi ku katekisi. Nakona loyi i Sesi Wheeler. Hakunene ndzi tsakile ku hlangana na wena. Nakona ndzi...nkateko wa mina lowukulu, ro sungula, ndza tshembha, tani hilaha ndzi tivaka hakona, ku hlangana na wena. Kutani loyi i n'wana wa n'wina. I mani vito ra yena? [Sesi Wheeler a ku, "Carlena Rebecca."—Muhleri.] Carlena Rebecca. Kunene, i xinhwanyetana xa kahle njhani, xi xongile

hilaha xi nga vaka hakona. Sweswi, Carlena Rebecca Wheeler lontsongo.

¹¹ Makwerhu Wheeler hi un'wana wa madiyakoni ya hina kwala kerekene, nakona Xikwembu xi katekisile ku hlangana ka vona, ku fika eka loyi lontsongo. Ndzi pfumela leswaku u na, kwalomu ka, ndza swi tiva, tintombhi timbirhi, a hi swona? [Makwerhu Wheeler a ku, "Tinharhu."—Muhleri.] Tintombhi tin'wana tinharhu. I vamanana va kahle swinene, tani hilaha ndzi twisisaka hakona, swingaleswi ndzi khongela leswaku Xikwembu xi ta endla leswaku Rebecca a fana na lavan'wana. Wa vona? Kutani sweswo ku tava ku enetiseka eka n'wina hinkwenu, a hi swona? Hi swona sweswo, hikuva i vana va kahle swinene.

¹² A ndzi tivi loko kuri ku u ta ndzi pfumelela ndzi n'wi tlakula kumbe ee, kambe, loko a nga pfumeli, hi ta n'wi tlhandleka mavoko. Xana u nga swi tsakela ku ta haleni ka mina, Rebecca? Wa swi lava kuva ndzi ku tlakula? Sweswo swi kahle swinene. I xinhwanyetana xo saseka njhani!

Sweswi a hi korhamiseni tinhloko ta hina.

¹³ Tatana wa le Matilweni wa tintswalo, tani hilaha hi yimeke emahlweni ka mudiyakoni loyi, vusiku lebyi; hakenene i hofisi ya kahle swinene leyi a yi khomeke, hikuva mudiyakoni u fanele a kumeka a ngari na xisolo, nuna wa wansati un'we, loyi a lawulaka muti wa yena hi ku hetiseka. Hikuva, loko a nga swi tivi ku lawula muti wa yena, xana a nga yi lawurisa ku yini yindlu ya Xikwembu? Kutani ha Ku khensa kuva makwerhu loyi a fikelerile swilaveko, nakona hi kuma eka yena e Moya wa Xikwembu.

¹⁴ Kutani sweswi u tisa xihlangi xa yena xa nhwenyana lahawani, ku ta katekisiwa. U xi vekile emavokweni ya vona kuva va xi kurisa. Xikwembu, na hilaha hi khensaka hakona, leswaku hi nga vula, leswaku ku navela ka vona hi leswaku xi tava tani hi vasesi va xona lavan'wana. Hi nyike, Tatana, leswaku leswi swi va tano. Nakona ingaku n'wana a nga hanya na—na kuva na ntirho wa kahle eka Wena, Tatana. Kutani sweswi, hi Vito ra Yesu Kreste, hi nyikela xihlangi lexi eka Wena ku va na vutomi bya ku ku tirhela. Xi endlxi va na rihanyo lerinene, xi tiya; leswaku xi hanya vutomi byo leha, ku kondza Yesu a vuya, loko sweswo swi koteka. Kutani, Tatana, hi pfumela leswaku xi ta kurisiwa hi ku tshinya ka Kreste. Nakona hi nyikela vutomi bya xona eka Wena, kuva vutomi bya ku ku tirhela. Amen.

¹⁵ Xikwembu xi ku katekisa, Rebecca. Nakona Xikwembu xi mi katekisa, Makwerhu Wheeler na Sesi Wheeler. Hosi yi va na n'wina.

¹⁶ Ku njhani? Sweswi hi lexi xinhwanyetana xin'wana xi nga na n'wayitelo lowukulu exikandzeni xa xona. Xana i mani vito ra xona? [Manana wa xona a ku, "Rhonda Renee Coats."—Muhleri.]

Rhonda Renee Coats, hi swona xana? Xana u na vuxaka byo karhi na Jesse na lavan'wana, Jesse Coats? ["Ee."] Ntsena a ndzi ehleketa... A ndzi tiva van'wana va ka Coats kwala dorobeni. Ndzi va tiva swinene, nakona va vile—va vile vanghana va mina eka—eka nkarhi wo leha.

¹⁷ Rhonda, Rhonda Renee. Ndza tivutisa loko u nga ta eka mina, Rhonda? Ndzi ta—ndzi ta ku tlherisela eka manana wa wena, ntsena loko hi heta ku ku nyikela eka Hosi Yesu. Sweswi, xana a nga xonganga!

Sweswi a hi korhamiseni tinhloko ta hina.

¹⁸ Tatana wa le Matilweni, tani hi nkulukumba wa Wena nakona ndzi yima kun'we vusiku lebyi, hi ntwanano na hi ku pfumelelana eka Evhangeli, manana loyi u tisa Rhonda Renee lontsongo eka Wena eku katekisiwени. U n'wi vekele emavokweni ya yena, kuva a n'wi hlayisa, na swona nchumu wo sungula lowu a nga wu endlaka i ku n'wi vuyisela eka Wena. Tani hilaha Yobo wa khale a nga vula hakona, i Hosi yi nyikaka swilo leswi. Kutani ha khongela, Xikwembu, leswaku U ta n'wi hlayisa ku fika ka awara leyi U nga ta teka. Nakona, Xikwembu, hi nyike leswaku a hanya vutomi bya Xikreste bya xiviri na kuva xikombiso eka van'wana, loko a ri karhi a kula. Katekisa kaya ra yena, nakona ingaku ri nga tinyiketela eka Wena, eka ntirho wo hetiseka, hi timbilu ta ntiyiso. Kutani sweswi, Xikwembu, hi nyikela Rhonda Renee Coats lontsongo eka Wena, hi Vito ra Yesu Kreste, kuva na vutomi bya ku ku tirhela. Amen.

U xongile swinene! Xikwembu xi ku katekisa, sesi.

¹⁹ Ku njhani! [Sesi a ku, "Robert Paul Schamel."—Muhleri.] Robert Paul Shane? ["Schamel."] Schamel.

²⁰ Kunene, a hi nge... Nakona wa hari ntsongo, a ndzi tshembhi leswaku u nga pfuxa huwa yotala mayelana na swona. U nga ndzi hleki ku kotisa sweswo. Langutisa lahwani, loko u lava xin'wana xo hleka xona. Robert Paul, i vito ro saseka njhani!

A hi korhamiseni tinhloko ta hina.

²¹ Xikwembu, tani hilaha nhwenyana lontsongo a taka lahwani; ntsena, eka hina, u tava n'wana. Nakona u le ku nyikeleni ka xijahetana xa yena, O Xikwembu, tani hi vutomi bya ku tirhela Wena. Hi xona muhandzu na mbuyelo wa ku hlangana ka vona. Ndza khongela, Xikwembu, tani hi nkulukumba wa Wena nakona ndzi tlhandleka mavoko ehenhla ka nakulorhi lontsongo, leswaku vutomi bya yena byi ta nyikeriwa eka Wena. Hi nyike swona, Hosi, leswaku loko kuri na mundzuku, ingaku xi nga rhwala Hungu leri vatswari va xona—va xona va nga ri yingisela, Xikwembu. Hi nyike swona. Nakona ndza khongela leswaku U ta katekisa makaya ya vona, na swona ingaku n'wana a nga kurisiwa hi ku tshinya ka Xikwembu, na

kuva e—e mudyondzisiwa wa Wena loyi a rhandzekaka. Hi n'wi nyikela eka Wena hi Vito ra Yesu Kreste. Amen.

²² Hi swona, i—i mufana un'wana wa kahle. Hi sweswo ntsena. Ina, nkulukumba. U ngaka u nga kombeli xin'wana xo xonga ku antswa, a hi swona? Ku hava nchumu wun'wana emisavemi lowu nga vaka wo xonga ku antswa, hi swona sweswo, ku tlula nakulorhi lontsongo. I ku n'wayitela hinkwaswo! I ku xonga sweswo? [Nhlengeletano yi ku, "Amen."—Muhleri.]

²³ Walowo i nkarhi wun'we ntsena laha nsati wa mina a navelaka ntirho wa mina, ku tlakula swihlangi sweswo. U rhandza ku swi tlakula. Ndza swi rhandza, na minavu, kambe ndzi tshamela ro chava leswaku ndzi nga va tshova. Va swonghasi, ma swi tiva, ku xonga swonghasi na ku languteka va lava vukheta swinene, kambe, ma swi tiva, hakunene va—va tiyile ku tlula leswi hina hi nga vaka hi ri xiswona.

²⁴ Sweswi, ndzi mi byerile leswaku ndzi ta huma... Kunene, ntsena ndzi na makume nharhu-ntlhanu wa timinetse. Ndzi ta fanele ku hatlisa, a hi swona? A hi voneni. A ndzi—ndzi—ndzi vuli ku—ku avanyisa nchumu hi ku hoxisa, kumbe ku vula swin'wana swo hoxeka, kambe ndzi ta ringeta hi matimba swinene, hikuva... Ma swi tiva, endzhaku hi kongoma e—e ehenhla ka patu, a hi—a hi hanyanga ku kotisa leswi a hi ri xiswona, ma swi tiva. Timayili nkarhi wun'wana ta tika, nakona mintirho yimbirhi kumbe yinharhu hi siku, hikokwalaho ka yini...

²⁵ Kutani xana xiphemu-nkulu, i swivono leswiya. Ku chumayela a swi ndzi vavisi. Mina, ndzi nga yima kwala siku hinkwaro, a swi ndzi karhati, kambe ndzi... Kambe ntsena swivono leswiya, na loko vanhu va ri eka vukonanisi, sweswi hi leswi va faneleke kuva na swona. Wa vona? Sweswo hi leswi va nga tela swona lahwani. I nchumu lowu nga taka wu nga tshamisekisiwi hi ku tlhandlekiwa mavoko. Ku fanele ku tiveka rimintsu, masungulo ya swona, leswi swi nga swi vanga, leswi swi endlaka, kutani leswi swi faneleke ku endlifa ku swi swi humesela ehandle. Sweswo hi leswi va nga tela swona lahwani.

²⁶ Sweswi, nhlengeletano ya sungula, endzhaku ka vusiku bya mundzuku... kumbe, ee, ndzi kombela ku khomeriwa, i vusiku bya Ravunharhu, eShreveport, Louisiana. Kutani loko kuri ku mi na vanghana kwalahaya, hikokwalaho ka yini, va byeleni va ta. Tabernakele ya Life, ndza ehleketa, hi laha yi—yi sungulaka kona, handle ka loko yi tsemakanya muako lowukulu, loko va ta kuma walowo, lowu wu va nyikaka kamara nyana yo tshama eka yona. Kambe va na rikupakupa exithezini, na ndhawu leyikulu ya le hansi, kutani ndhawu ya le hansi ehansi ka yaleyo. Swingaleswi, a ndzi swi tivi leswaku yi nga tshamisa vangani, kambe i... Loko ko biha swinene, kumbexana hi nga kuma muako lowukulu ntsena ku tsemakanya na wona, lowu nga

ta... A ndzi swi tivi leswaku wu tshamisa vangani, hambi swi ri tano. Ndzi vile na swikhongelo kwalahaya, kambe a ndzi tsundzuki. Lowu i—i khonivhexini ya lembe na lembe.

²⁷ Malembe manharhu lawa ya nga hundza a ndzi ri kwalahaya, nakona hi sungurile mpfuxelelo, hi Vito ra Hosi, nakona a wu se tshama wu hela, hi mpfhuk ka sweswo. Ntsena ku tshamela ku yisa emahlweni, ntsena ku yisa emahlweni; masiku hinkwawo, vanhu va nghena, va ri karhi va ponisiwa, va khuvuriwa, na kuya emahlweni na Hosi ku kotisa sweswo, tiministara na hinkwawo va ri karhi va nghena endzeni. Nakona ntsena hi... Ntsena loko swi ya emahlweni ku kotisa sweswo, kutani ndzi kumeka ndzi sele lahawani, ndzi lava ku yi endzela nkarhi hinkwawo, kutani ndzi tiroxela marito nyana ya mina ivi—ivi ndzi hundzela emahlweni.

²⁸ Sweswi, sweswo swi ta sungula hi Ravunharhu, ivi swi hela hi Sonto. Xifihlulo xa Christian Business Men i... A ndzi... rivele vito ra hodela liya... Ndzi pfumela leswaku i... yi vitaniwa... Va, va ta mi byela loko mi fika kwalahaya. I xifihlulo xa va n'wamabindzu.

²⁹ Ndzi vile na nkarhi wa kahle lahaya, eka n'wina va n'wamabindzu lahawani, hi nkarhi wo hetelela lahaya. Hosi yi ponisile e—e rabi, wo huma edorobeni. Nakona, oho, a ndzi swi tivi hinkwaswo leswi nga humelela. A kuri nkarhi wa kahle eHosini, lahaya, ku chumayela hi Ntwanano wa Ngati. Swingaleswi hi... Sweswo hi leswi Mayuda ma tivaka swona; i ngati. “Handle ka ku halatiwa ka ngati, ku hava ku rivaleriwa,” ma swi vona.

³⁰ Sweswi a hi kongomeni eRitweni, na swona ndzi ta ringeta hi matimba ku hlayisa rito ra mina eka n'wina.

³¹ Kutani sweswi, loko Hosi yi swi rhandza sweswi, Sonto wa le ndzhaku ka Khisimus, loko mi ri eka tiholodeni ta n'wina na ku khandziya miya hala na hala, a hi riphuntiso na hinkwaswo, hikokwalaho ka yini, loko mi—mi ri kwala kusuhi, hikokwalaho ka yini, nghanani. Nakona hi kungahatile kuva na xikhongelo lahawani hi Sonto ni mixo, xa—xa—xa Sonto wa le ndzhaku ka Khisimus. Xana siku ra kona hi rini? [Un'wana a ku, “Ra vumakume mbirhi-nkaye.”—Muhleri.] Ra vumakume mbirhi-nkaye, siku ra vumakume mbirhi-nkaye, nakona wolowo i Sonto wa le ndzhaku ka Khisimus, siku ra vumakume mbirhi-nkaye. Sweswi, loko xin'wana na xin'wana xi humelela lexi hina, xin'wana, hi nge swi koti, hi ngaka hi ngavi kona... A hi swi tivi swa mayelana na nkarhi lowu tako, ma swi tiva. Kambe loko xin'wana na xin'wana xi humelela, hikokwalaho ka yini, n'wina lava mi hanyaka ehandle ka doroba, lava mi tako, ku kotisa vanakulorhi lava humaka eMemphis...

³² A ndzi lava ku twa Makwerhu Ungren a yimbelela *Hilaha U Nga Kahle Hakona*. Nakona a ndzi... Xana u kona vusiku lebyi?

³³ Kutani, swingaleswi, ndzi tshama ndzi ri na swilo swotala, ndzi ngaka ndzi nga koti ku swi endla hinkwaswo, ndzi ngaka ndzi nga koti ku swi endla hinkwaswo. Xikwembu xi mi katekisa, n'wina vanhu.

³⁴ Sweswi a hi pfuleni eMatsalweni sweswi ntsena kuva hi hlaya e—e Matsalwa swintsongo. Laha, loko marito ya mina ya tsandzeka, Lawa ya nge tsandzeki. Kutani Xikwembu xi ta mi katekisela kuva mi sele, ntsena hi mhaka ya ku yingisela Rito ra Xona. “Ku pfumela ku ta hi ku yingisa, ku yingisa Rito ra Xikwembu.” Hi swona sweswo? Sweswi a ndzi ri karhi ndzi ehleketa... Loko, ma ha pfula eka Mukwetsimi Yohana ku avanyisa ka vu6, ku sungula hi ndzimana ya vu60, na ku hlaya ya vu71, hi ku katsakanya. Mukwetsimi Yohana 6:60.

³⁵ Sweswi a ndzi ri karhi ndzi ehleketa, loko ndzi tava ndzi langutile ehandle ka fasitere ku ngari khale ngopfu, na ku langutisa ku pela ka dyambu na ku vona hilaha ntumbuluko hinkwawo wu nga na nawu hakona. Kutani loko nkarhi wa xixika wu fika, nawu, hi woxe, wa ntumbuluko, wu tsutsumisela mafi ehansi etimintswini ta nsinya. Ya lahliwa.

³⁶ Tani hilaha Yobo a nge te, “Oho, loko ingi U ndzi fihlile esirheni, loko ingi U ndzi fihlile exivandleni xa xihundla vukarhi bya Wena byi ko byi hundza.” Kutani sweswi, sweswo hi swona, “Loko ingi a Wu ndzi fihlile!” Wa vona, u vonile e—e ntumbuluko, nsinya, vutomi byi rhelela ehansi etimintswini; Makwerhu Way, “Kutani ndzi tshama kona ku kondza vukarhi byi hundza, kutani u ndzi vitana u ta ndzi vekela nkarhi.” Wa vona?

³⁷ Ntumbuluko wu na nawu. Kuna nawu wa ntumbuluko; ku hava ndlela na swintsongo yo wu papalata. I nawu wa ntumbuluko. Kutani kuna nawu wa moyo; kuna, nakona, ku hava ndlela yo papalata sweswo.

³⁸ A ndzi ri karhi ndzi vulavula na vatekani van'wana ndzhengha lowu, mayelana na ku, u ngaka u nga herisi nchumu. Vanhu va ngaka va nga herisi nchumu. Va nga ha hahlula, kambe ku ngari ku herisa. Kutani un'wana a ku, “Kunene, u ri yini hi ku teka na ku hisa xiphemu xa phepha, xana sweswo swa ri herisa?” Ee, nkulukumba. Ntsena swo tshovelela tikhemikhali swi ti hambanyisa, ku hisa ka ndzilo. Ti tlhelela endzhaku eka mimoya, leswi a ti ri xiswona eku sunguleni. U ngaka u nga herisi. Nakona loko misava a yo yima nkarhi wo leha ku ringanelia, mimoya liya yi fanaka, sweswo na—na tikhemikhali leti a ti ri eka phepha rero, a swi ta vuyelelana ivi swi va xiphemu xa phepha nakambe. Sweswo swi tano. U ngaka u nga herisi. Swi tano.

³⁹ Xikwembu, manuku. Loko kuri na ku pfuxiwa ka hinkwaswo, ku tlhelela endzhaku nakambe, nakona ku ngari na ku herisiwa, kuna ku pfuxiwa ka lava vo lulama, ina, nakona hi fanele ku tlhela hi vuya. Sweswo hi leswi nga kona eka swona.

Ku hava ndlela na swintsongo yo swi endla. Swi ngari na mhaka leswaku mi tshwile, loko mi nwerile, kwihi na kwihi laha swi nga humelela kona, swi ngaka swi nga herisi.

⁴⁰ Ntsena tsundzukani leswaku xiphemu xin'wana na xin'wana xa n'wina a xi ri kona, loko Xikwembu xi vulavula kuva misava yi humelela. Xi vekile miri wa n'wina kwala hi nkarhi walowo. Na swona ku hava nchumu lowu wu nga wu susaka handle ka Xikwembu. Hinkwaswo swi tlhelela emavokweni ya Xona nakambe. Wa vona? Nakona hi Xona Lexi, Lexi xi nga, Mutumbuluxi, a kuri Xona Lexi nga endla xitshembhiso, swingaleswi hi na ntiyiso wa leswaku kuna Vutomi lebyi nga Heriki. Nakona hi na xitiyisiso etimbilwini ta hina sweswi, leswaku sweswi hi na Vutomi lebyi nga Heriki, Vutomi lebyi nga Heriki lebyi nga taka byi nga fi, endzeni ka hina sweswi. Swi lulamile.

⁴¹ Mukwetsimi Yohana 6. A hi sunguleni sweswi hi ku avanyisa ka vu6 ka Mukwetsimi Yohana, na ku sungula hi ndzimana ya vu60.

Vadyondzisiwa va yena lavo tala, kute loko va swi twile, va twile leswi, va ku, Leri i rito ro nonohwa; loyi a nga ri twisisaka i mani xana?

Kambe Yesu a swi tiva...hi yexe leswaku vadyondzisiwa va yena va n'unun'uta hikokwalaho ka swona, kutani a ku ka vona, Xana mhaka leyi ya mi khunguvanyisa xana?

Swi...to yini loko mi ta vona N'wana wa munhu a tlhandlukela laha ingi a ri kona khale?

Hi—hi wona...moya lowu hanyisaka; nakona nyama a yi vuyeriwi hi nchumu: timhaka leti Ndzi mi byelaka tona, i moya (lowu nga Yena), nakona ti vutomi. (Xana U te yini? "Hi mina Ntiyiso, na Vutomi.")...i moya,... ti vutomi.

Kambe van'wana va kona exikarhi ka n'wina lava nga pfumeriki. Hikuva Yesu a tiva ka hari ku sunguleni leswaku lava nga pfumeriki i vamani, ni loyi a nga ta n'wi xenga.

Kutani a ku, Hikokwalaho Ndzi nga mi byela, leswaku a ku na munhu loyi a nga taka ka mina, loko a nga nyikiwi hi Tatana wa mina.

Kutani ku sukela nkarhi walowo vadyondzisiwa va yena lavo tala va tlhelela endzhaku, va nga ha tami va famba na yena. ("Mhaka yo nonohwa," wa vona, a nga ta yi teka.)

Kutani Yesu a ku ka lava va khume na vambirhi, Xana na n'wina a mi rhandzi ku tifambela-ke?

Kutani Simon Petro a hlamula a ku ka yena, Hosi, hi ngaya ka mani xana? hikuva u na marito ya vutomi lebyi nga heriki.

Kutani hina hi pfumela sweswo nakona ha swi tiva leswaku hi wena Kreste, Nwana wa Xikwembu lexi hanyaka. (Mina!)

Yesu a n'wi hlamula, Xana a hi mina Ndzi nga mi hlawula n'wina va khume na vambirhi, kasi un'wana wa n'wina i javulosi?

A vula Yudas Iskariota n'wana Simon: hikuva hi yena loyi a ta n'wi xenga, un'wana wa lava va khume na vambirhi.

⁴² Sweswi, loko ndzi nga vitana leswi kuva dyondzo ya vusiku lebyi, na ku ringeta hilaha ndzi kotaka hakona ku endla leswaku hafu liya ya awara yi tirha, ndzi lava ku vulavula hi: *Tinxaka Tinharhu Ta Vapfumeri*.

⁴³ Nakona ndzi vurile xitatimende minkarhi yo tala. Nakona a ndzi anakanya leswaku, “Kunene, ndzi pfumela leswaku ndzi ta chumayela hi yona nkarhi wun’wana, ndzhengha lowu.” A ndzi anakanya.

⁴⁴ Vo sungula i vapfumeri, vapfumeri vo tiendlisa, na lava nga pfumeriki. Sweswi, yaleyo hakunene i—i—i dyondzo. Kambe, ku kotisa leswi hi nga tshama lahwani vusiku lebyi, ntlawa walowo wu tshama wu hlengeletanile kun’we. Hinkwako-nkwako laha vanhu va hlengeletanaka kona, hi kuma ntlawa lowu, nakona hi tshamela ro wu kuma, nakona swi nga ha endleka kuva hi tshamela kuva na wona ku kondza ku fika ku Vuya ka Hosi. Kutani ndzi lava hina, vusiku lebyi, kuva hi tifanisa hina hi hexe, tani hilaha ndzi vulavulaka hi mintlawa leyi nharhu, kutani hi vona leswaku i ntlawa wihi lowu hi nga ka wona.

⁴⁵ Sweswi tsundzukani, ndzi le ku vulavuleni lahwani kumbexani na... Kereke leyi, yi tele nakambe vusiku lebyi, hinkwako, na makhumbhi na tikhorido, kambe nakambe ndzi vulavula na misava hi ku rhendzeleka. Wa vona? Eka swiphemu hinkwaswo swa misava, tithepi leti ti rhendzeleka hi, tiministri ta tithepi.

⁴⁶ Sweswi ndzi lava ku vulavula hi tinxaka tinharhu to hambana ta vupfumeri sweswi. Sweswi tsundzukani, *vapfumeri*, dyondzo ya mina i *vapfumeri*. Un’wana wa vona i mupfumeri wa ntuyiso, kutani loyi a landzelaka i mupfumeri wo tiendlisa, kutani ku landzela loyi a nga pfumeriki. Wa vona?

⁴⁷ Sweswi, ntlawa wo sungula loyi hi nga ta tsakela ku vulavula hi yena, i mupfumeri. Hikuva, ndzi ehleketa leswaku u fanele kuva wo sungula, hikuva hi yena loyi a pfumelaka hi ntuyiso, sweswi, u pfumela ku kotisa hilaha vadyondzisiwa a va pfumela hakona lahwani. Hi ya eku tirhiseni ka Tsalwa leri hi nga

ri hlaya tani hi xikombiso. Sweswi, vo sungula i vapfumeri, vapfumeri va xiviri. "Kutani ku pfumela ku ta hi ku yingisa, ku yingisa ka Rito ra Xikwembu," Rito ra Xikwembu, leri ri nga Kreste. Wa vona, vapfumeri!

⁴⁸ Sweswi, xana mi xi lemukile xitatimende lexi xa kahle lexi mupfumeri loyi a nga xi endla? Sweswi, mupfumeri a nga boheki kuva munhu wo tlhariha hi ndlela ya misava ya kuva wo tlhariha. A nga boheki kuva munhu wo dyondzeka hi ndlela leyi vanhu lava va ringetaka ku—ku vula leswaku mi boheka kuva hakona; kambe a mi boheki. N'wina... Wanuna loyi a nga endla xitatimende lexi, Bibele hi Yoxe yi virile leswaku a ri havumbirhi "ku pfumala vutivi" na "ku ka a nga dyondzekanga." Petro, hakunene a nga tekeriwi enhlokweni tani hi munhu wo tlhariha.

⁴⁹ Eka Esaya 35, yi ri, "Gondzo ri tava kona, ni ndlela, nakona yi ta vuriwa, 'Ndlela yo kwetsima.' A kuna munhu wa thyaka loyi a nga ta hundza kona."

⁵⁰ A ndzi ri karhi ndzi vulavula na un'wana wa madiyakoni ndzhengha lowu, tani hi leswi a hi ri karhi hi vulavula hi mabiloho lawa ya lehaka ya tsemakanya, na leriwani rintshwa. Ndzi te, "Kuna ku ndlandlamuka hi ku tsemakanya mimiri ya mati, marhavi ya nambu namuntlha." Kutani ndzi ku, "Kambe kuna ndlandlamuko wun'we lowukulu lowu fikelelaka ku suka emisaveni kuya eVukwetsimelweni, ku vitaniwa, 'Gondzo ra Hosi.' A kuna munhu wa thyaka loyi a nga ta hundza kona." Hi swona sweswo. I—i patu lerí nga akiwa hi Kreste Hosi ya hina, ndlandlamuko lowu nga endliwa ku suka emisaveni leyi kuya eTikweni rin'wana, nakona lavo thyaka a va hundzi ka wona.

⁵¹ Petro, munhu loyi wo thyaka, wa... a yimile ekusuhi, loko a tava a vonile Rito ra siku leri tiyisisiweke hi ku hetiseka, laha Xikwembu xi nga tshembhisa hi siku rero leswaku ku tava na Un'wana loyi a nga ta pfuka loyi a nga tava e—e Muprofeta exikarhi ka vona. Kutani Simon a nonohwa ku swi pfumela, hikuva a ku tava na vuencenetyi byo tala bya Swona. Kambe loko a tava a vonile ra xiviri, Rito ra nguva leri nga songiwangiki, na ku N'wi twa hi ku hetiseka a titivisa hi Yexe, u—u khorwile hakunene leswaku A ri Mani. Nakona hi yena, loyi a nge te, "Hosi, hi ngaya ka mani xana?" loko a tava a vutisiwile.

⁵² Loko e—e mintshungu yi ri karhi yi hambana, exikarhi ka vapfumeri, na lava nga pfumeriki, na vapfumeri vo tiendlisa, a kuri na vunharhu bya vona hinkwavo va yimile kwalahaya eka ntlawa lowukulu wa vanhu; vapfumeri, vapfumeri vo tiendlisa, na lava nga pfumeriki, lava va kumekaka kahle eka ku avanyisa loku lahwani. Kutani hikuva Yesu a vulavurile Marito hi ndlela leyi A nga swi endlisa xiswona, swi hambanyisile nhlengeletano ya Yena. Kambe swi fanele ku endliya.

⁵³ A ri wanuna wa kahle ntsena loko A ha horisa vavabyi, kambe loko swi ta eka Dyondzo na vuprofeta, sweswo hi leswi swi hambanyisaka e—e mungu eka koroni. Wa vona? Mungu ntsena wu phutsela ehandle ka koroni. A hi wona koroni. A wu tirhisowi. Ku hava nchumu eka wona. Ku hava Vutomi eka wona. Hi wona xikhamba, nakona wu ngaka wu nga tshami na koroni. Wu ngaka wu ngavi mudyandzhaka na koroni. Nakona wu na... Ntsena ndoho hi yona leyi hi vulavulaka hi yona, mbilu ya ndoho ya koroni.

⁵⁴ Sweswi xiysisani, Petro a khorwile leswaku Yaloye a ri Mesiya. Sweswi, a swi endlili ku hambana leswaku lavan'wana hinkwavo va te yini. A swi endlanga ku hambana leswaku muprista u te yini. A swi ngari na mhaka eka Simon Petro leswaku kereke yi te yini. A khorwile, yena hi yexe.

⁵⁵ Yesu u n'wi byerile, eka ndhawu yin'wana laha A nga vutisa, "Xana vanhu va ri Ndzi mani?"

⁵⁶ "Kutani van'wana va te U 'muprofeta,' nakona van'wana va te hi Wena 'un'wana wa vaprofeta va khale a nga pfuka,' nakona—nakona hi Wena 'Muxe,' kumbe 'Elias,' kumbe munhu un'wana."

Yena a ku, "Ndzi vutisile *wena*. *Wena* u ehleketa yini?"

⁵⁷ Kutani Petro a ku, "U Kreste, N'wana wa Xikwembu lexi hanyaka."

⁵⁸ Yena a ku, "U katekile, n'wana Yona; Simon, n'wana Yona; hikuva a hi nyama na ngati leswi nga ku paluxela sweswo. A wu kalanga u swi dyondza ebukwini, kumbe eka mikhuva, kumbe eka nkomiso wa milawu ya vukhongeri. U... Tatana wa Mina, loyi a nga eTilweni, u ku paluxerile leswi." Hi yaloye mupfumeri wa xiviri; nhlavutelo wa ximoya wa Rito. Wa vona? Kutani ehenhl-... "U Simon, nakona ehenhla ka ribye leri, ra nhlavutelo wa wena wa leswaku Ndzi Mani, Ndzi ta aka Kereke ya Mina, na swona tinyangwa ta tihele ti ngaka ti nga Yi hluli." Wa vona?

A swi hlamarisi kuva Simon a te, "Hi ngaya ka mani xana?"

Yesu a hundzuluka a ku, "Xana na n'wina mi navela ku tifambela-ke?"

⁵⁹ Kutani va ku, "Hosi, i mani hi nga ta n'wi, hi ngaya kwihi xana? Hikuva, Wena u ri wexe u na Marito ya Vutomi. Hi Wena u ri Wexe."

⁶⁰ Hikuva, A ngari na Marito ya Vutomi ntsena, A ri Rito ra Vutomi. Wa vona, A ri Rito ra Vutomi, nakona Simon u lemukile leswi hi ku hetiseka. Kutani loko a swi lemukile, sweswo a kuri leswi a khomelerile eka swona, hikuva a swi paluxiwile eka yena leswaku A ri Rito lero leri hanyaka.

⁶¹ Sweswi, yaloye i mupfumeri wa xiviri, loko Moya lowo Kwetsima; ku ngari wun'wana lowu hlongorisuwaka hi munhu

un'wana, ku ngari hi nchumu wun'wana. Kambe loko Moya lowo Kwetsima wu ku paluxerile Rito hi Roxe, nakona u vona Rito ri vekewile erivaleni, ri tiyisisiwile; kutani Moya wa Xikwembu wu ta kutani wu nghena endzeni ka nguva yaleyo, eka Rito ra nguva yaleyo, kutani wu ri endla ri vonakala.

⁶² Xana munhu a ta ala njhani ku pfumela Luther loko a swi tivile sweswo? Luther a ri wa rhifoma. Moya wa munhu wu yile emahlweni lahaya eka rhifomexini. Wesley, hi ndlela yin'we. A va fanele ku swi pfumela. Wa vona, rero a kuri—rero a kuri hungu eka nguva ya kereke. Sweswo a kuri leswi nga humelela hi ku hetiseka. Sweswo a kuri leswi a swi fanele ku humelela. A mi boheka ku swi pfumela.

⁶³ Kutani hi hina lava, ku rhelela eka Nguva ya Laodekiya. Nakona ha dyondzisiwa, eka Nguva ya Laodekiya, leswaku Kreste u vekiwile ehandle ka kereke ya Yena; nakona u le ku gongondzeni enyangweni, ku ringeta ku vuyela endzeni. Swingaleswi loko hi vona sweswo swi ri karhi swi humelela, ha swi tiva leswaku i nguva yihi leyи hi hanyaka eka yona.

⁶⁴ Nakona, manuku, hi le ka ku pfariwa ka matimu ya misava. Buku sweswi yi le ku hetiweni. Ntila wo hetelela wu ta tsariwa ku tsemakanya yona siku rin'wana, nakona yi ta pfariwa, kutani nkarhi wu tava wu herile.

⁶⁵ Kutani kuna ntlangu wa swiphemu lowukulu wu nga ku endlifiweni. Nakona Tintsumi ti yimile ehenhla ka xibakabaka, ti hlalerile. Ma swi tiva leswaku ntlangu wa swiphemu i yini. Vatlangi va lunghekile. Mi nga ha va vona va ri karhi va tlanga.

⁶⁶ Mi nga ha n'wi vona lowo biha a ri karhi a tlanga. Mi nga ha yi vona mbabva ya ntlangu, hilaha yi taka eka ntlangu na mano ya yona, ku ta hambukisa.

⁶⁷ Kambe mi nga ha vona Kereke leyи nga tlhandlukisiwa yi ri karhi yi tilulamisa hi Yoxe. I mbono wa kahle. Mi nga ha vona Vukona bya Xikwembu byi ri karhi byi tiyisisa na ku endla ntlangu wa swiphemu lowu wu nga vhumbhiwa kwala Bibeleni leyи, kuva wu titlanga hi woxe. I nkarhi muni wo hanya eka wona, nkarhi wo kwetsima swinene! Vanhu va tinguva hinkwato a va navela nkarhi lowu. Vaprofeta va khale va naverile ku vona awara leyи, kambe a va vanga na nkateko.

⁶⁸ Sweswi, a kuri na mupfumeri. Hikuva, u swi vonile. U swi pfumerile. "Hi kholwa hi ku hetiseka leswaku U Kreste, Mesiya, Rito ra Xikwembu eka siku leri, nakona hi pfumela sweswo." Wa vona, yaloye a ri mupfumeri wa xiviri.

⁶⁹ A hi tekeni nyana vapfumeri van'wana, hi xihatla, hi nga se ya eka ximunhuhatwa lexi landzelaka. A hi tekeni muprofeta, Nowa. Loko yena, a ri kumbexana murimi, kumbexana a ri tano hi masiku yalawa, murimi. Kambe loko vasandzi na vakhongeri va siku lero... Kereke a yi ri eka xiyimo xo tsana, kutani Xikewmbu xi vulavula na Nowa, na ku byela Nowa leswaku a

fanele ku aka ngalava. Nowa a nga kalanga a njhekanhjekisana na Xikwembu hi sweswo. U Swi pfumerile, leswaku a Ri ri Rito ra Xikwembu, kutani a ya eku tirheni hi xihatla ku lunghekisa swilo.

⁷⁰ Yaloye i mupfumeri wa xiviri. A nga bi huwa hi swona. Loko u khorwile hi ku hetiseka, hi swona sweswo. Ntsena tani hi mani na mani, ripfumelo rihi na rihi, ndlela yihi na yihi. "Ripfumelo ri ta hi ku yingisa." Loko mi nga ha yima lahawani, swi ngari na mhaka leswaku dokodela u ri ku hoxekile yini hi n'wina! Laha, wanuna a nga mi nyika xikambelwana xa timhang, nakona kumbexana a ri karhi a swi tiva leswi a vulavulaka hi swona, ku fika laha switirhisiwa swa yena na vutivi swi nga ta n'wi pfumelela ku tiva ku fika kona, kambe a vula leswaku a ka ha salanga nchumu handle ka rifu. Kambe, ma khongela, nakona loko mi yimile kwalahaya eka yumundzuku mi nga ha vona wanuna wa kahle kumbe wansati a yimile kwalahaya. Ina, hi swona sweswo. Nakona sweswo swova swona. Mi ta famba kuya eka sweswo ntsena mi tiyile ku kotisa xin'wana na xin'wana, hikuva ma swi pfumela. Xikwembu xi swi vurile. Ma swi tiva leswaku swi tano.

⁷¹ Tani hi wansati lontsongo loyi a khohlolaka mfukuzani, wa vona. A ku ngari na ku kanakana emiehleketweni ya yena, sweswo a swi ya eku humeleleni. Mfukuzani a yi file, nakona a yi chuchekile, kutani yi ya ekule. Wa vona? Hi swona sweswo. Ma swi pfumela.

⁷² Tani hi tatana loyi a nga tisa xijahetana xa yena, ku ngari khale ngopfu, le ndzeni. Nakona u kona kun'wana kwala muakwini sweswi. Xijahetana xi vile na ku wa, kutani xi lahlekeriwa hi dzanu ra xona. A xi nga ha tsundzuki nchumu. Ntsena endzhaku ka xinkadyana, endzhaku ka ku khongela, ndzi xi vutisile vito ra xona. Xi ndzi byerile, na leswaku a xi ri na malembe mangani, kutani a xi ri kwalahaya xi ri kahle hilaha mufana wihi na wihi a nga vaka hakona. Wa vona? Va pfumela. Kutani loko Xikwembu xi vula swin'wana na swin'wana, swi fanele kuva hi ndlela yaleyo.

Kutani Nowa a pfumela Xikwembu, na swona Nowa a tekeriwa enhlokweni tani hi mupfumeri.

⁷³ Daniel, loko kereke yi ri evuhlongeni le Babilona, Daniel a pfumela Xikwembu. Nakona swi ngari na mhaka hilaha a va ku, "Hi ta endla xitiviso. Va ngaka va nga khongeli xikwembu xin'wana handle ka xifaniso lexi nga lahaya," xa wanuna loyi wo kwetsima, kumbe hambi ku ngava yini. Daniel a nga swi yingisanga sweswo. A twile Xikwembu, hikuva a ri muprofeta, nakona Rito a ri tile eka yena. Nakona loko tempele yi katekisiwa, ku vuriwile, "Loko munhu un'wana na un'wana a ri ekhombyeni etikweni rin'wana na rin'wana, kutani a languta hi ndlela leyi ku kongomana na xivandla xo kwetsima, kutani a

khongela, kutani u ta twa ku suka hi le Tilweni.” Nakona Daniel a pfumela Xikwembu. A ri mupfumeri wa xiviri, na hambi kuri tinghala a ti nga ta n’wi dya. Nakona sweswo hi swona, wa vona, a ri mupfumeri wa xiviri. A ri na swin’wana swa ntiyiso na xiviri. A ri mupfumeri.

Davhida, mupfumeri un’wana, xiyatsayatsa nyana xa mufana.

⁷⁴ Daniel a nga tekanga ndhawu eka kereke ya ximanguva lawa, hambi a ri Nowa a nga tekanga ndhawu na kereke ya ximanguva lawa. Na swi ntsongo. A vari vapfumeri eka leswi Xikwembu a xi swi vula kuva swi ri Ntiyiso. Swi ngari na mhaka leswaku misava ya ximanguva lawa a yi ku yini, a va pfumela leswi Xikwembu a xi vula leswaku i Ntiyiso. Valava i vapfumeri va xiviri.

⁷⁵ Ntsena ku fana na hilaha Petro a nga endla hakona, na vaapostola, a va pfumela leswaku A ri na Rito ra Vutomi nakona a ri Rito ra Vutomi. Ndzi pfumela nchumu lowu fanaka namunthla. Kutani nchumu wihi na wihi lowu lwisanaka na Wona, a hi wona, i rifu. *Leri* ri ri roxe i Rito ra Vutomi, na swona Kreste i Rito.

⁷⁶ Sweswi, Davhida, nakulorhi wo ka a nga nyawuli. Eku sunguleni, kumbexana a tlakuriwa hi vamakwavo va yena, hikuva a ri nakulorhi lontsongo. A nga kulanga ku ringanelu ku rhwala swiambalo swa nyimpi. A nga taya enyimpini, na swona a ri ntsongo ngopfu na ku lala. Nakona, hambi swi ri tano, u yile kwalahaya, tani hi mupfumeri.

⁷⁷ Kutani loko a ha tshamile endzhaku ka mananga (a langutile e—e ntlhambi nyana wa tinyimpfu leti tata wakwe a n’wi nyikile leswaku a ti hlayisa, hi xipelupelu, etikweni leri ku nga na tinghala na tiberhe na mahlolwa, na swin’wana), Davhida u sungurile ku langutisa madyelo ya rihlaza lawa a ya ri na ndzhuti, kutani a tiva leswi a swi vula swona eka tinyimpfu kuva tiya eka ndzhuti walowo, kutani ti pavalala eku hiseni ka dyambu; a tiva leswi nga kahle, mati yo titimela yo nwa a ya vula swona, tani hilaha a nga te, “Hilaha mhunti yi rilelaka mati ya milambu, moya wa mina wu navela Wena, O Xikwembu.” Wa vona? U ririle, a khongela.

⁷⁸ Kutani siku rin’wana ku humelerile mhangu ya xitsuketa, nghala yi vutla yin’wana ya tinyimpfu ta yena, kutani yi tsutsuma. U anakanyile, “Xikwembu lexi xi nga ndzi endla ndzi va ehenhla ka nghala!” Wa vona? Kutani u tekile xipelupelu ivi a tlatlalatela nghala ehansi, hi xiribiana lexi a xi ri eka xipelupelu. Sweswi, loko munhu un’wana a ngava a tshame a vona nghala, yin’wana ya tinghala ta le Afrika, tinghala letikulu ta tinhamu ta voya leti va nga na tona le Palestina na Asia, a va ta swi tiva leswaku vanakulorhi lava va njhani. Loko, maginamu leyikulu ya madzana nharhu yi tikeriwa hi ku yi tlatlalata,

kutani yena u yi tlatlalatile hi ribye. Nakona loko nghala yi pfukile endzhaku ka yena, u yi khomile hi malevhу kutani a yi dlaya. Xexo hi xona xivangelo xo va a tiva leswi a vulavula hi swona; u vile na ntokoto. U vekile Xikwembu eka xikambelo, mayelana na Rito ra Xona.

⁷⁹ Nakona a—a nga n'wi chavi Goliyadi, hikuva, a nga yimbanga. A ngari mupfumeri, na swintsongo; na loko Goliyadi a humela ehandle ku ya n'wi rhukana hi vito ra swikwembu swa yena.

⁸⁰ Kutani Goliyadi, a kurile ku tlula leswi yena a ri xiswona; nakulorhi lonkulu, a ri na tintiho ta tiinchi ta khume mune. Sweswi, tintiho a ti tava ti lehile ku kotisa *sweswo*, wa vona, tintiho ta tiinchi ta khume mune, nhenga. Nakona kumbexana baji ra xisirhelelo leri a ri ambarile, kumbexana a ri tika madzana nharhu wa tipondzo, kumbe ku tlula, wa vona, leri a ri ambarile. Xihuku, na lexikulu... kumbexana nsimbhi ya kona a yi ri inchi na hafu ya inchi hi ku bumbula. Xihontlovila xo kurisa xisweswo, xi ri karhi xi famba na—na nereta ya murhungi leyi a ku koxiwa kuva yi ringana na makume mbirhi wa magoza. A xi ri na tlharhi ra makume mbirhi wa magoza evokweni ra xona. Sweswi xana swi nga ta njhani kuva munhu wihi na wihi... Wanuna wo tani hi yaloye a nga ha yima a tlakula vavanuna va ngari vangani, kutani a va cukumeta ku kotisa *sweswo*, loko va ri karhi va ta. I mulwetani wa njhani!

⁸¹ Kutani a ri kwalahaya, a yimile lahaya, a ri karhi a tibumabumela, a tinyungubyisa. Loko e... swi tikomba ingaku nkateko wu le hansi, wa vona, a ku, “A kuve... Ku ngavi na ku halaka ka ngati.” A ku, “A kuve—a kuve na wanuna loyi a nga ta lwa na mina, kutani loko ndzi n'wi hlula, kutani n'wina hinkwenu mi ta ndzi tirhela; nakona loko—loko—loko n'wina mi hlula, kutani hina hi ta tirhela n'wina.” Wa vona, loko javulosi a ehleketa leswaku u na nkateko ehenhla ka n'wina, wa vona, hi kona laha a rhandzaka ku endla vutinyungubyisi bya yena. Kambe a hlanganile na wanuna wo hoxeka. U hlanganile na wanuna lontsongo ku tlurisa etikweni, lontsongo, wa makatla yo voyama, nakulorhi wo languteka a nga nyawuli.

⁸² A ku, “Xana mi lava ku ndzi byela leswaku n'wina, e—e vuthu ra Xikwembu lexi hanyaka, mi ta yima kwalano ivi mi pfumelela Mufilista loyi a nga yimbangiki a tsan'wa vuthu ra Xikwembu lexi hanyaka-ke?” Hikokwalaho ka yini, a hlamarisiwile hi swona! Hikokwalaho ka yini? Hikokwalaho ka yini? A ri mupfumeri. Lavan'wana a vari vapfumeri vo tiendlisa. Wa vona? Wa vona, a ri mupfumeri wa xiviri. A ku, “Loko kuri ku ma chava, ndzi taya ndzi ya lwa na yena.” Wa vona? I ntihontlhо wa njhani eka nakulorhi lontsongo wo kotissa yaloye! Swingaleswi a ri mupfumeri, nakona u endlile hi ku hetiseka leswi a swi tiva leswaku Xikwembu a xi ta swi endla. Hi yena e...

⁸³ Loko Mufilista loyi a nga yimbangiki a n'wi rhukana hi vito ra swikwembu swa yena, a ku, "Xana ndzi mbyana; leswi matebyana ya xihlangi ya humaka ku kotisa sweswo? Hikokwalaho ka yini," a ku, "Ndzi ta ku tlakula hi le makumu ya tlharhi ra mina, nakona ndzi ta ku hayeka le henhla ka nsinya kutani ndzi pfumelela swinyenyana swi jovotela nyama ya wena." Oho, mina! Oho, a ri nakulorhi wo chavisa njhani!

⁸⁴ Davhida a ku, "U ta ka mina hi banga na tlharhi, na swiambalo swo tisirhelela. U ta ka mina hi vito ra Mufilista. Kambe, mina ndzi ta ka wena ndzi ngari na banga kumbe tlharhi, swiambalo swo tisirhelela, kambe ndzi ta ka wena hi Vito ra Hosi Xikwembu xa Israel."

⁸⁵ Hi sweswo. I mupfumeri yaloye. I khokholo ra yena lero. I xitlhangu xa yena xexo. I xisirhelelo xa yena xexo. Amen! Sweswo a swi fanele swi ri xisirhelelo xa Kereke. Mupfumeri un'wana na un'wana, Xexo i xisirhelelo xa yena. Swi ngari na mhaka leswaku ku humeleta yini, leswaku misava yi ri yini, swin'wana na swin'wana, xisirhelelo xa n'wina i Hosi Xikwembu xa Israel. Hi swona sweswo. "Vito ra Yesu Kreste i khokholo ro tiya, lavo lulama va balekela ka rona kutani va hlayiseka." I xisirhelelo xa hina xexo, i Yesu Kreste.

⁸⁶ Xiyisisani, kutani loko swi ta humeleta, ha swi tiva leswaku ku humelerile yini. Davhida, ku ri hava ndhawu yo ba kona kambe xindhawana lexiya xin'we loko xi tava xi wiserile xisirhelelo xa xona—xona—xona exikandzeni xa xona. Ndhawu yin'we ntsena yo ba a yi ri kwala mombyeni wa yena. Nakona loko a nga se fika empfhukeni wo karhi na—na xihontlovila, Xikwembu xi kongomisile mfungho wo dlaya, kutani a dlaya xihontlovila. Wa vona? Xikwembu xi swi endlile. Sweswi, hi lemuka leswaku a ri mupfumeri.

⁸⁷ Sweswi, mupfumeri un'wana a kuri Abraham, nakona a ri wa... Mukaldea wa doroba ra Ur. Kutani u vitaniwile kuva a ta endla nchumu lowu a wuri...na ku pfumela nchumu lowu hi ku hetiseka, a wu nga koteki hi tlhelo ra swa nyama. "Kambe a nga dedelekanga eka xitsembhiso xa Xikwembu hi ku kala ripfumelo," ku vula Varhoma 4, "kambe u tiyile, a dzunisa Xikwembu."

⁸⁸ Loko Abraham a ri na makume nkombo-ntlhanu wa malembe hi vukhale, na nsati wa yena a ri na makume ntsevu-ntlhanu wa malembe hi vukhale, nakona va ri karhi va hanyile swin'we ku sukela loko va hari vafana lavantsongo. A kuri makwenu wa yena wa xisati; mufana lontsongo na nhwana lontsongo. Nakona sweswo a kuri leswaku, a va hanyile swin'we, va ngari na vana na swintsongo. Kutani Xikwembu xi byela Abraham, "Tihambanyisi na lava va nga pfumeriki." Hi minkarhi hinkwayo Xikwembu xi vitanelia, ku tihambanyissa. "Tihambanyisi na lava va nga pfumeriki kutani u famba na

Mina, nakona Ndzi ku endlile tatana wa tinxaka to tala. Ndzi swi endlile khale.”

⁸⁹ Kutani Abraham u swi pfumerile. I mupfumeri yaloye. “Xana u ta swi endlisa ku yini, Hosi?” a nga kalanga a vutisa xivutiso xexo. Xikwembu xi te Xi ta swi endla, nakona sweswo swa swi hetisekisa.

⁹⁰ Loko n’hweti yo sungula yi hundza, nakona Sarah a ha ri . . . A hundzile malembe yo vona masiku. “Kuna swin’wana swo hambana?”

“Ku hava nchumu.”

⁹¹ Kambe Abraham u tamile a ha swi pfumela. Endzhaku ka makume mbirhi-ntlhanu wa malembe, a ku nga seva na ku hambana, kambe Abraham u tamile a ha swi pfumela. I mupfumeri yaloye. A hi mupfumeri wo tiendlisa. I mupfumeri yaloye. Endzhaku ka makume mbirhi-ntlhanu wa malembe, Abraham a tiyile ku tlula hilaha a ri hakona eku sunguleni. “A pfumela Xikwembu, nakona u hlayiwile loyi a lulameke hikwalaho ka swona.” Hikuva u vi . . . Yaloye i mupfumeri wa xiviri.

⁹² Sweswi, endzhaku ka nkarhi ndzi ta mi pfumelela ku kambisia mi vona leswaku mi le ka ntlawa wihi.

⁹³ Sweswi xana Abraham u endlile yini? “A nga dedelekanga eka xitshembhiso xa Xikwembu,” leswi nga kotekiki.

⁹⁴ Xana wanuna wa makume nkombo-ntlhanu wa malembe hi vukhale, na nsati wa makume ntsevu-ntlhanu wa malembe hi vukhale, va nga endla yini, loko va ngaya eka dokodela kutani va ku, “Hi lava ku endla xikombelo, exibedlele. Hi ya eku kumeni ka n’wana”? Kutani, endzhaku ka makume mbirhi-ntlhanu wa malembe, va ku, “Dok, wa ha xi pfurile xibedlele-ke?” Wa vona? Wa vona?

⁹⁵ Swi ku endla u tikhoma hi ndlela leyi nga tollovelekangiki. Swiboho swa wena a swi tollovelekanga, eka misava. Kambe i mupfumeri, swi ngari na mhaka hilaha swi langutekaka swi nga tollovelekanga hakona. Bibele yi vurile, leswaku, “A khorwile hi ku hetiseka leswaku Xikwembu xi ta endla leswi Xi nga vula leswaku Xi ta swi endla.”

⁹⁶ Sweswo a swi fanele kuva ku vuyeriwa ka mupfumeri un’wana na un’wana ndzhengha lowu. Xikwembu xa swi kota ku hlayisa Rito rin’wana na rin’wana leri Xi nga vula leswaku Xi ta ri endla. A ndzi na mhaka na leswaku tidinominexini ti ri yini, marito, “Siku ra masingita ri hundzile, nakona leswi hinkwaswo i ku hlaya miehleketo na hinkwaswo, i ku vhumbha. I ku . . .” A swi na mhaka eka mina leswi va swi vulaka. Ndza ha pfumela. Loko xibalesa xexo xi korotiwiile eka pakani, xi ta ba pakani. Nakona ndzi pfumela leswaku loko mupfumeri a korotiwiile hi Rito ra Xikwembu, u ta ba nchumu lowu fanaka.

Loko Rito ra Xikwembu ri kale ri swi tshembhisa, ri ta swi endla nakambe. Ndzi kholwa sweswo hi ku hetiseka. Leswaku, loko hi vona leswaku hi le ka nguva leyi loko yi fanele kuva kona, yi fanele kuva kona. Swilo leswi swi fanele ku humelela.

⁹⁷ Xexo hi xona xivangelo xova ndzi pfumela leswaku loko Mutekiwa a vitaniwile na ku hlawuriwa, kutani a tshama eBukwini ya Vutomi, ku ta ta mpfumawulo ku suka eTilweni lowu nga ta nghenisa nkhuvulo wo tani hi wa Moya lowo Kwetsima eka Mutekiwa lowu nga ta N'wi susa emisaveni, ku ya eka tintswalo to Vutleriwa. Xikwembu xi swi tshembhisile. A swi na mhaka leswaku i tisayense tingani, na leswaku i vativi va tinyeleti vangani lava va nga va sayina, na leswin'wana hinkwaswo, na leswaku i timiliyon'i tingani ta timayili leti va nga ti vonaka; a ndzi na mhaka na swona sweswo. Kuna Tilo, naswona kuna Yesu Kreste xidzi Lahaya loyi a nga ta vuya hi xivumbeko xa miri ku ta amukela Kereke ya Yena eka Yena n'winyi. Swi ngari na mhaka hilaha switori leswi swi langutekaka swi ri swa khale hakona, swa ha ri Ntiyiso. Xikwembu xi virile tano. Sweswo hi—sweswo hi leswi vapfumeri va swi pfumelaka.

⁹⁸ Xikwembu xi te, “Hi mina Hosi leyi horisaka vuvabyi bya n'wina hinkwabyo. Hi mina Xikwembu nakona a Ndzi cinci.” Amen! Nakona Xikwembu i Rito. Kutani loko kuri ku Xikwembu a xi cinci, xana Rito ri ta cinca njhani? Wa vona? “Hi mina Xikwembu, nakona a Ndzi cinci.” Matsalwa ya vula sweswo. Xikwembu xi swi virile, hi Xoxe. Swingaleswi loko kuri ku a Xi cinci, kutani hi Xona Rito. “Eku sunguleni Rito a ri ri kona, nakona Rito a ri ri na Xikwembu, kutani Rito a xi ri Xikwembu.” Rito leri nga cincekiki! “Kutani Rito ri endliwile nyama, kutani ri tshama exikarhi ka hina.” Amen! Ina, nkulukumba.

⁹⁹ Xikwembu xi pfuxile mimiri, hinkwako ku rhelele eka; Muxe, na Ezekiel, na Yeremiya, na Esaya, na Eliya, ku rhelela hinkwako, laha Rito ra Xona a ri fika kona eka nkarhi nyana. Kambe Rito ro hetiseka ri vonakarisiwile eka Wanuna loyi Yesu Kreste. Loyi, A ri Xikwembu hi—Xikwembu hi ku hetiseka ka Vukwembu emirini. Kwalahaya a Xi endliwile nyama. Ndzi pfumela sweswo, Rito hinkwaro.

Yobo, mupfumeri un'wana.

¹⁰⁰ Nkarhi wun'wana, vapfumeri va hoxiya emiringweni. Ku ngari nkarhi wun'wana; nkarhi hinkwawo! “Hikuva n'wana un'wana na un'wana loyi a taka eka Xikwembu u fanele ku layiwa, a ringiwa, a dyondzisiwa tani hi n'wana.” Tsundzukani, miringo, mapatu ya ritshuri, dyambu ro hisa ra ku xanisa, kambe ku tshembheka ka mbilu ya n'wina ku ba nchumu walowo ku kondza wuva lowu lulameleke ku nghena endzeni ka xivumbeko. Vana va Xikwembu va endliwile hi ku lulama eRitweni ra

Xona, hikuva hi vona swikombiso leswi hanyaka, nakona Rito ra Xikwembu ri hanya eka vona. Wa vona? Ndzingo wu tela ku ta mi dzudza, ku mi veka le hansi-hansi, ku vona laha mi yimeke kona. Va ringile, ku ringa n'wana un'wana na un'wana loyi a taka eka Xikwembu.

¹⁰¹ Yobo u hundzile emiringweni na ku ringetiwa. Vana va yena va tekiwa; leswin'wana hinkwaswo swi tekiwa. Swirho swa kereke swi ta, swi n'wi hehla hi kuva a ri mudyohi wa le xihundleni, na ku ringeta ku vula hinkwaswo swo lwsana na yena, kambe hambi swi ri tano a nga yingisanga na xin'we xa swona. A swi tiva leswaku a fikelerile swilaveko swa Xikwembu. A swi tiva leswaku a swi pfuni nchumu kuva Sathana a n'wi pfuka. A swi tiva leswaku a kuri javulosi. Nakona ntsena loko Sathana a ha kota ku n'wi endla a pfumela leswaku vuvabyi bya yena a kuri Xikwembu xi byi endlaka, u endlile leswaku Yobo a xupuriwa. Kambe loko Yobo a tava a tlumbile nhlavutelo walowo, sweswo a ku ngari Xikwembu! Ntsena o va eku hundzeni emiringweni ku n'wi endla a va swin'wana. A ku ngari Xikwembu xi swi endlaka. A kuri Sathana a swi endlaka.

¹⁰² Nakona i nchumu wun'we namuntlha. U ta ringeta ku mi byela leswaku miringo leyi na swilo i Xikwembu xa n'wina xi ringetaka ku veka nxupulo ehenhla ka n'wina. A swi tano. Ee, nkulukumba. I Sathana a endlaka sweswo, kutani Xikwembu xa swi pfumelela, ku mi ringa; ku endla leswaku mi vona loko mi—mi bohiwile eka misava leyi, hi ku vilela hi swa misava, kumbe loko kuri ku xuma xa n'wina xi le Tilweni. “Hikuva laha xuma xa wena xi nga kona, hi laha na wena u nga kona.” Hi swona sweswo. Mbilu ya wena yi laha xuma xa wena xi nga kona.

¹⁰³ Yobo, u ringiwile, kambe hambi swi ri tano a ku, “Ndza swi tiva leswaku Mukutsuri wa mina wa hanya; hi masiku yo hetelela U ta yima ehenhla ka misava. Hambi loko swivungu swa nhlonge swi onha miri wa mina . . .”

¹⁰⁴ Xana mi swi lemukile? Swivungu swa nhlonghe i khale swi ri endzeni ka yena. Swivungu swa nhlonge ya n'wina swi le ndzemi ka n'wina. Mi le ndzemi ka bokisi leri nga lemeriya ku ngavi na moyo endzeni ka rona, kumbe hi ndlela yihi na yihi, kambe swivungu swa nhlonge i khale swi ri kwalahaya. Swi le ndzemi ka n'wina, nakona swi lunghekerile ku vitaniwa entirhwemi nkarhi wun'wana na wun'wana. Tsundzukani Kaizara, u humile swilondza kwalahaya xitarateni. Swivungu swa nhlonge swi n'wi dyile, kwale xitarateni, swivungu swa nhlonghe ya yena n'winyi. Swi kona kwalahaya, swi lunghekile.

¹⁰⁵ “Hambi loko swivungu swa nhlonge ya mina swi onha miri lowu, hambi swi ri tano ndzi ta vona Xikwembu ndzi ri enyameni ya mina.” Amen! Mi ngaka mi nga wu herisi. Hambi loko swivungu swa nhlonghe swi wu dya, wa ha ta tlhela wu vuya nakambe. “Ndzi ta tilangutela xona hi ndzexe. Mahlo ya mina ya

ta xi vona, ku ngari ya wumbe.” U swi vurile, Yobo. Hikokwalaho ka yini? A ri mupfumeri. Emiringweni a ri mupfumeri. Eku xanisekeni, a ri mupfumeri. A ri mupfumeri wa xiviri.

¹⁰⁶ Yosefa, mupfumeri un’wana, a nga ta cinca leswi a ri xiswona. A ri mupprofeta. Xikwembu xi n’wi endlile mupprofeta. A nga lavi kuva loyi a hambaneke na vamakwenu wa yena, kambe a hambanile. Xikwembu xi n’wi endlile leswi a ri xiswona. A ku ngari na loyi a ta teka ndhawu ya yena.

¹⁰⁷ A kuna munhu loyi a nga ta teka ndhawu ya n’wina, swi ngari na mhaka hilaha yi nga yintsongo hakona. Mi ri, “Ndzo va nghamu ya muti ntsena.” A kuna loyi a nga ta teka ndhawu ya n’wina. Xikwembu, eka ikhonomi ya Xona leyikulu, xi vekile tano, Miri wa Kreste, hi ntshamiseko, ku kondza ku ngavi na munhu na un’we loyi a nga ta teka ndhawu ya n’wina. Hilaha a ndzi ta tsakela ku teka ndhawu ya Billy Graham, un’wana na un’wana wa hina tiministara, kambe hi ngaka hi nga swi endl; kambe, ntsena tsundzukani, Billy a ngaka a nga yi teki ndhawu ya hina. Wa vona, hinkwerhu hi na ndhawu, van’wana va hina hi vaevhangeli, van’wana i vaprofeta, van’wana i vadyondzisi, van’wana i vafundhisi, hambi hi ngava hi ri yini; van’wana i tinghamu ta muti, van’wana i vamakhanikhi, van’wana i varimi, hambi ku ngava yini, Xikwembu xi mi vekile eka ndhawu ya n’wina. Wa vona?

¹⁰⁸ Yosefa a ri mupprofeta. A nga ta tikhoma hikuva a kota ku hlamusela milorho. A nga ta tikhoma hikuva a vona swivono. Vonani hilaha a ri na ntiyiso hakona. A swi ngari na mhaka loko swi n’wi tekela xinakulobye xa yena na vamakwenu wa yena, a ri ni ntiyiso, hikuva a pfumela milorho yaleyo. A pfumela leswaku, norho lowu a ngava na wona, leswaku hinkwavo va ta n’wi khinsamela, swikatsa a swi ta swi endla. Swi humelerile hikuva a swi pfumela. A ri mupfumeri wa xiviri. Hilaha . . .

¹⁰⁹ Ndzi na ntlhanu wa timinetse; na khume ra mapheji, xiyisisani sweswi, xiyisisani, Matsalwa lawa ya tsariweke lahawani. Wansati . . .

¹¹⁰ Natanael, a ri mupfumeri. Hi swona sweswo? Natanael, loko a tava a vonile leswi nga humeleta; nakona swi tirhile eka yena, leswi Yesu a nga n’wi byela leswaku a ri mani, na ku vula leswaku a ri e—“Muisrael hakunene,” nakona a kuri hava “xisolo” eka yena, na ku n’wi byela leswaku a ri kwihhi hi xa tolo, “eku khongeleni ehansi ka nsinya.” U n’wi vonile loko-loko Filipi a n’wi vitana. A ri mupfumeri.

¹¹¹ Kuna votala lava a va yimile lahaya, va ku, “Lowu i moywa wa javulosi. I javulosi a endlaka ku horisa ka Matimba.” Javulosi yaluya wa khale a nga se fa na namuntlha. Va pfumela leswaku javulosi hi yena a endlaka ku horisa ka Matimba.

¹¹² Yesu u te, “Loko Sathana a nga hlongola Sathana, kutani mfumo wa yena wu avanile, na swona mfumo wu ngaka wu nga

yimi." Wa vona? Sathana u vurile, eka... A ngaka a nga swi endli. Swingaleswi, Sathana a ngaka a nga hlongoli Sathana.

¹¹³ Swingaleswi Natanael a ri mupfumeri. Kute loko a vonile Rito ri endliwile nyama, swi tiyisisa leswaku a ri mupfumeri, u te, "Wena u... Rabi, Wena u Kreste. Wena u Hosi ya Israel." U swi pfumerile.

¹¹⁴ Loko wansati wa le xihlobyen i a swi vonile, u swi pfumerile. Hi yena mupfumeri.

Loko Bartimiya lowo fe mahlo... Loko wansati a tile...

¹¹⁵ Munhu un'wana na un'wana a ri karhi a rila, kuya emahlweni. Van'wana va vona va ku, "Kuna hinkwawo... Ndzi twile leswaku U pfuxa vafi. Kuna masirha lawa ya nga tala hi vona lahaya; tana u ta va pfuxa. Hi pfumeleli hi vona loko U swi endla." Wa vona, javulosi yaluya a nge te, "Loko U ri N'wana wa Xikwembu, lerisa maribye lawa leswaku ya hundzuka xinkwa." Yaluya a nga N'wi pfala xikandza hi gume, a N'wi ba enhlokweni, a ku... va hundziselana nhonga, un'wana eka un'wana, va ku, "Sweswi, loko U nga hi byela leswaku i mani a nga Ku ba, hi ta Ku pfumela." Kutani masocha, wa vona, va ri karhi va N'wi endla xiphukuphuku. A swi tikomba ingaku xipetlu xa khadi a xi werile, ehenhla ka Yena.

¹¹⁶ Kambe ntsena tsundzukani, Xikwembu xi tshama xi ri eka mbono. Wa vona? Xi kwalahaya xi lunghekile, nkarhi wun'wana na wun'wana.

¹¹⁷ Sweswi Yesu u te, "Ndzi nga vulavula na Tatana wa Mina kutani xikan'we-kan'we A nga Ndzi rhumela mavandla ya Tintsumi ya khume na mambirhi." Oho, xana Ntsumi yin'we yi nga endla yini? Wa vona? Kambe, ma swi vona, kambe Xi nga rhumela mavandla ya khume mbirhi hi ku lerisa ka Yena. Kambe A ri na ntirho wo wu endla. A ri na swo swi endla. A fanele ku hundza eka sweswo.

¹¹⁸ Mi na leswi mi faneleke ku swi endla. Xikwembu xi mi khomerile leswi mi faneleke ku swi endla. Mi nga hava mi ri na ku vava ka mbilu na swiphiqo swin'wana, mi nga hava mi ri na ku tsandzeka ko karhi, kambe xana ha khongela ku swi papalata-ke? Ee. "Hosi, ndzi hundzisi eka swona, hambi swi ngava swi ri yini. Hambi swi ngava swi ri yini, u nga ndzi pfumeleli ku swi balekela. Loko swi vekeriwile mina, ntsena ndzi nyike tintswalo to hundza eka sweswo. Hi sweswo ntsena."

¹¹⁹ Xiyisisani, Bartimiya lowo fe mahlo, a swi tiva sweswo. A va byeriwile leswaku, "Loyi i Muprefeta wa le Galeliya. Hi yena N'wana Davhida. Ha swi pfumela." Van'wana va vapfumeri va tava va n'wi byerile sweswo. "Hina vapfumeri ha swi tiva leswaku hi Yena e... N'wana luya wa Davhida."

¹²⁰ Nakona a swi tiva, leswaku loko kuri ku hi Yena, A ri Rito. Kutani loko kuri ku a swi tiva leswaku A ri Rito, a swi tiva

leswaku A nga vonisisa mianakanyo ya mbilu, swingaleswi u huwelerile, "Wena N'wana Davhida, ndzi twele vusiwana." Lava nga pfumeriki a va ri karhi va huwelela *leswi*, na *sweswo*, swirho swa kereke. Sweswo a swi n'wi yimisanga Bartimiya lowo fe mahlo na swintsongo. U te, "O Yesu, Wena N'wana Davhida, ndzi twele vusiwana!"

¹²¹ Kumbexana A nga n'wi twi. Kambe A swi tiva leswaku a ri eku huweleleni, kutani A yima ivi a hundzuluka. Hi luya mupfumeri. A ku, "Ripfumelo ra wena ri ku ponisile." Amen.

¹²² U vurile sweswo eka wansati loyi a karhatiwa hi ngati, nchumu wun'we, "Ripfumelo ra wena."

¹²³ Hikuva, u vurile endzeni ka mbilu ya yena leswaku, "Loko ntseña ndzi nga khumbha nguvu ya Yena, ndzi ta hanya."

"Ripfumelo ra wena ri ku ponisile." Wa vona, a ri mupfumeri.

¹²⁴ Walowo i nchumu wun'we lowu nga ponisa William Dauch, loyi a tshameke lahawani, siku rin'wana, eka ku tsandzeka loku hetisekeke ka mbilu, na ku hlaseriwa ka mbilu, wanuna wa makume nkaye-n'we wa malembe hi vukhale. "Ripfumelo ra wena ri ku ponisile." Hikokwalaho ka yini? Hi yena mupfumeri.

¹²⁵ Mufundhisi Tom Kidd lahawani, hambi leswi a ya eka... kusuhi na, ndza tshembha, kwalomuya ka makume nkaye wa malembe sweswi, hi vukhale, kusuhi na swona. Kutani loko a hari na makume nkombo-nkaye wa malembe hi vukhale, va n'wi yisile exibedlele a ri na mfukuzani ya vununa. Dokodela a ku, "A nga na nkateko."

¹²⁶ Kambe loko hi nghenile mixo walowo, hi vonile mupatriyaka lontsongo a ri na nxolo emakatleni ya yena, a tshamile kwalahaya, a ri karhi a ba ximhandzana, a nga hari hi vuyena. U byerile mukhegula un'wana a tshamile kwalahaya, a n'wi vitana kokwana; a n'wi tiva, a ri un'wana wa swirho swa yena swa malembe. A ku, "U languteka u basile ku kotisa gamboko," a hundzile ku anakanya ka miehleketo ya yena.

¹²⁷ Hambi swi ri tano, loko Matimba ya Xikwembu ya bile kamara, wa hanya vusiku lebyi. Sweswo swi vile mune wa malembe lawa ya nga hundza. Wanuna loyi a ri kusuhi na makume nhungu wa malembe hi vukhale, nakona hi loyi kwala a nga tshama vusiku lebyi, u titwa a hetisekile na kuva kahle, ku suka eka mfukuzani. Wa vona, ku ngari mupfumeri wo tiendlisa; mupfumeri! Hi sweswo, pfumelani! U teka Xikwembu eRitweni ra Xona.

¹²⁸ Ntsena ku fana na hilaha Bartimiya lowo fe mahlo a ri hakona. A fe mahlo, kambe hambi swi ri tano a swi tiva, leswaku loko a nga koka rinoko ra Yesu Kreste, a nga kuma leswi a swi lava.

¹²⁹ Wansati a swi tiva, leswaku loko a nga khumbha nguvu ya Yena, a ta kuma leswi a swi lava—a ta kuma leswi a swi lava.

¹³⁰ Tom a swi tiva. A ri na ripfumelo, leswaku loko ndzo n'wi khongeleta, a nga kuma leswi a swi lava.

¹³¹ Xana rero a hi rona ripfumelo rin'we leri Marta a nge te, "Hambi kuri sweswi, Hosi, hinkwaswo leswi U nga ta swi kombela ka Xikwembu, Xikwembu xi ta Ku endlela swona; makwerhu wa mina u etlele lahaya, u file, mune wa masiku esirheni; kambe loko U kombela Xikwembu, kutani Xikwembu xi ta Ku endlela Swona"?

A ku, "Makwenu wa wena u ta tlhela a pfuka nakambe."

¹³² Kutani wansati a ku, "Ina, Hosi, hi masiku ya makumu, eku pfukeni ka vafi, u ta pfuka. A ri jaha ra kahle."

Yena a ku, "Kambe hi Mina ku pfuka na Vutomi!"

"Ina, Hosi, ndza pfumela sweswo, na swonavu."

"Xana mi n'wi lahlile kwihi?" Hi sweswo. Swi herile. Ina, nkulukumba.

¹³³ Hosikazi ya le Dzongeni yi tile ku suka eka rixaka leriya ra lava nga pfumeriki, hi swona sweswo, kutani yi yima kwalahaya na ku pfumela leswi yi nga swi vona kuva swi ri swa Xikwembu. Bibele yi ri, "Yi ta yima hi siku ra makumu, na rixaka rero, kutani yi ri avanyisa, hikuva yi tile ku suka emakun'wini ya misava ku ta twa vutlharhi bya Solomon."

¹³⁴ Muxe a ri mupfumeri. Hambi leswi a nga ringeta hi vutlharhi, u ringetile matshalatshala hinkwawo lawa a ta ya kota, kambe a ya nga ta tirha. U ringetile ku humesela Israel ehandle, a swi tiva leswaku a vitaniwile ku ta swi endla. U ringetile hi ndlela ya tinhlayso. U ringetile hi ndlela ya masocha. U ringetile hi ndlela ya dyondzo. U ringetile hi ndlela yin'wana na yin'wana, kambe a ti nga ta tirha. Kambe u vuye a teka ndlela ya Xikwembu.

¹³⁵ Xana ku humelele yini? A kuri na Ndzilo le henhla exihlahleni, siku rin'wana, lowu a wu nga heli. Ku suka kwalano Rito ri vulavurile na yena, kutani ri ku, "HI MINA." Ku ngari, "A kuri mina," kumbe, "Ku tava mina." "HI MINA." Nakona Wa hari "HI MINA." Hi yena Rito, hilaha ku nga Heriki, Rito leri nga riki na makumu.

¹³⁶ Muxe a nga kanakananga. Ku tikeriwa ka yena, ntumbuluko hinkwawo ku lwisana na yena, swilo hinkwaswo ku lwisana na yena. Kambe, nhonga yo gombonyoka evokweni ra yena, u rhelerile ehansi a ya teka vulawuri bya rixaka hinkwaro, a ri nwerisa eLwandle ro Tshwuka lahaya, kutani a yisa Israel etikweni ra xitshembhiso. Hikokwalaho ka yini? A pfumela Xikwembu. Swi lulamile. A ri na . . .

¹³⁷ Yaloye i mupfumeri. Hi nga yima . . . Sweswi ndzi yimile hafu ya awara ya mina eka vapfumeri.

¹³⁸ Ndza ha ri na mintlawa yin'wana yimbirhi. Hi ta hatlisa eka yona, hikuva a hi ya nkoka, hambi swi ri tano. Ee.

¹³⁹ Kutani, wa vumbirhi, ku ta loyi a nga pfumeriki kwalano. A hi vulavuleni hi loyi a nga pfumeriki. Xana loyi a nga pfumeriki u endla yini?

¹⁴⁰ Hi vona mupfumeri (yini?) a amukela Rito; muhlovo wun'wana na wun'wana, rixaka rin'wana na rin'wana, ndlela hinkwayo ku sukela eka Nowa, ndlela hinkwayo kuya ehenhla. Hi nga teka ntsevu wa tin'hweti ya mpfuxelelo eka sweswo kona kwalahaya, hi ri karhi hi tisa swimunhuhatwa. Va pfumela. Mupfumeri a nga vutisi. Mupfumeri wo Swi pfumela, swi ngari na mhaka leswaku Swi twala njhani kumbe leswi munhu un'wana a nga ta swi vula mayelana na Swona, hilaha Swi langutekaka swi nga koteki hakona.

¹⁴¹ Mupfumeri wa Ri pfumela, u pfumela (yini?) Rito. Ku ngari mikhuva; Rito! Ku ngari dinominexini; Rito! Ku ngari leswi munhu un'wana a swi vulaka; leswi Rito ri swi vulaka! Sweswi, tsundzukani, yaloye i mupfumeri. Mupfumeri a nga vutisi. Mupfumeri a ngari, "Swi nga endlekisa ku yini? Loko ndzo hlamusetiwa Swona!" Yaloye hi loyi a nga pfumeriki. Ahaa. I mupfumeri, loyi, hambi Swi ngava yini, "Loko Swi ri Rito, Swi Rito! Walowo i ntayiso." Yaloye i mupfumeri.

¹⁴² Sweswi loyi a nga pfumeriki. Sweswi hi vona leswi . . . Hi ta teka lava nga pfumeriki. Hi kuma leswaku a va endla swa kahle ntsena loko va bambateriwa enhlaneni na ku vuriwa vadyondzisiwa. Ntsena loko (vona) hinkwaswo swi famba kahle, a va ri kahle. Kambe loko Muprofeta loyi a va n'wi pfumela kuva a ri muprofeta, na kuva va swi tiva leswaku a ri yena, loyi a kota ku horisa vavabyi, na swin'wana, xana U endlile yini? Loko Ntayiso wa xiviri na ku tshinya ku fika, ku hambana na leswi a va swi pfumela, a va nga ta ri teka Rito.

¹⁴³ A va ta teka mahlori, nakona a va ma endla. Va humile va ya hlongola madimona, va chumayela Rito, nakona va tama va hari lava nga pfumeriki. Matewu 10, U va rhumile, hi vambirhi mbirhi, lava va makume nkombo, kutani va hlongola madimona, swonghasi lero Yesu a tlangela, kutani a ku, "Ndzi vonile Sathana a wa ku kotisa rihati hi le Tilweni." Wa vona, va hlongorile madimona; Yudas a ri na vona. Hi lava va taka lava nga pfumeriki.

¹⁴⁴ Kambe kute loko Yesu a sungurile ku vula leswaku A ri swin'wana, leswaku A ri "ku pfuka," A ri "Vutomi." "Xana mi to yini loko mi vona N'wana wa munhu a tlhandlukela laha A humaka kona?"

¹⁴⁵ “Sweswi, Wanuna loyi u ringeta ku vula leswaku U huma eTilweni, sweswo swa nonohwa eka hina. Hi ngaka hi nga Swi pfumeli.”

¹⁴⁶ Yena a ku, “Xana i yini? Nyama leyi mi vulavulaka hi yona, a yi vuyeriwi hi nchumu. I Moya lowu hanyisaka.”

¹⁴⁷ Hi sweswo. Moya wu hanyisa Rito. I Moya, ku ngari mikhuva. Moya, wa Moya lowo Kwetsima, wu hanyisa Rito eka n’wina, kutani ri va leri hanyak, kutani hi sweswo, ma swi vona. Hi ripfumelo ma swi vona. Ma swi tiva leswaku swi tano hikuva Rito ri virile tano, nakona Moya wu hanyisa Rito eka n’wina. Hi sweswo.

¹⁴⁸ Sweswi U te, “Swi to yini . . .” Kutaku loko hi endlile leswi, hi kuma leswaku, lava nga pfumeriki, loko u vula swin’wana leswi va nga pfumelelaniki na swona, va famba va ku siya. “Ntsena ndzi nge swi kot!” Oho, sweswo swi sungula ku dzika swinene, emisaveni namunthla. Sungula kutani u vula swin’wana . . .

¹⁴⁹ Va hlengeletana endzeni. Ndza swi lemuka etinhlengeletanwini va hlengeletana endzeni, mintshungu leyikulu, kutani u yima, u sungula ku vula swin’wana. Sweswi, ntsena loko . . . Vo titshamela kwalahaya, ntsena va hlalerile, ntsena va rindzerile. Kutani ntsena loko u ku, “Sweswi, Yesu Kreste u titivisile hi Yexe tani hi Mesiya, hikuva A ri Muprefeta,” ndzheko walowo wu va wu tele, kutani wu suka wu famba. Munhu un’wana . . . kutani va suka va famba. Xana i yini? Lava nga pfumeriki!

¹⁵⁰ Sweswi mi ri, “U le ku makeleleni ka sweswo.” A ndzi makeleleli. Ndzi vula ntsena leswi Bibele yi swi vulaka lahwani.

¹⁵¹ A vari lava nga pfumeriki, kutani va humile va famba. Hambi leswi a vari vadyondzisiwa, kambe a swi—a swi hambana na leswi . . . Va te, “Leswi, i mani loyi a nga pfumelaka nchumu wo tani hi Sweswo?” Wa vona? A vari Vafarisi na Vasaduki lava nga humeleta, va joyina na ku famba na Yena.

¹⁵² Hikuva, wa vona, loko leswi—loko leswi nga ehenhla ka ntumbuluko swi kombisiwa, swi humelerisa tinxaka tinharhu to hambana. Swi swi endlile ehansi le Egipta. Swi humelerisile loyi a nga pfumeriki, mupfumeri, na mupfumeri wo tiendlisa. Swi endlile mintlawa yinharhu hinkwayo. Ntsena swi tsariwile ehansi lahwani, ku kondza hi ya emahlweni na kuya emahlweni vusiku hinkwabyo, hi ri karhi hi swi hlamusela, hilaha swi nga xiswona. Hinkwako-nkwako, ma swi kuma, ma va vona lava nharhu. Swi hi ndlela yaleyo nkarhi hinkwawo, wa vona, ma va kuma.

¹⁵³ Sweswi vonani, lava va makume nkombo, va humile va famba hikuva a Ri nga pfumelelanai na leswi a va pfumela kuva swi lulamile.

¹⁵⁴ Hi hava mianakanyo leyi nga kuteni. Hi leswi A nga swi vula! Mi alela mianakanyo ya n'wina vinyi. Mi vula ntsena leswi A swi vulaka. Sweswo i ku tivula ka xiviri. Ku *tivula* swi vula ku “vula nchumu wun’we.” Loko ndzi tivula leswaku nchumu wokarhi wu humelerile, ndzi vula nchumu wun’we lowu nga humelela. Sweswo hi leswi ku tivula ka xiviri ku nga xiswona. “Nakona hi Yena Muprista Lonkulu wa ku tivula ka hina.” Wa vona? Ku vula nchumu wun’we lowu Xikwembu xi nga wu vula, wa vona, sweswo swi endla leswaku swi va kahle, hikuva ntsena mo va eku vuyeleriseni ka Rito ra Xikwembu.

¹⁵⁵ Sweswi xiysisani, lava va makume nkombo va humile va famba. Xana va endlile yini? Kutani va—va humile va famba hikokwalaho kova—kova va kanetile. Vutlharhi bya vona—vona—vona, ku joyina ka vona—vona ka kereke, a ku—a ku tele ngopfu. Sweswo a swi va nonohwela ngopfu ku ehleketa, leswaku Wanuna loyi a yimeke lahawani, leswaku e... Vanhu lavan’wana hinkwavo a va pfumela leswaku Yaloye a tswariwile hi vuhunguki. “A ngari na nfanelo yova Yena a tititana Xikwembu. Nakona A ri munhu ntsena.” Va ku, “A hi Ku khandleli ntirho wa kahle lowu U wu endlaka, kambe hi—hi Ku khandlela kuva Wena, U nga munhu, U tiendlaka Xikwembu.”

¹⁵⁶ Nakona Rito ri vula leswaku A ri Xikwembu. “U ta thyiwa Vito ra ‘Mutsundzuxi,’ ‘Hosi ya Kurhula,’ ‘Xikwembu xa Matimba,’ ‘Tatana hilaha ku nga Heriki.’” Matsalwa ya vona lawa a va ma hlaya!

¹⁵⁷ Na rona siku leri a vari eku yimbeleleni ka Tipisalema, Pisalema ya vu22, “Xikwembu xa Nga, Xikwembu xa Nga, xana U Ndzi tshikele yini? Hinkwawo marhambu ya mina ya Ndzi sondzolota.” “A kuna rhambu na rin’we ri nga ta tshoviwa.” Rona risimu leri a va rivuyelerisa etempeleni, kwalahaya a ku nembelela Xitlhavelo xi ri karhi xi huwelela marito yalawayaya Davhida a nga ma vula nhungu wa madzana ya malembe eku sungulen, nakona a va pfalekile mahlo ku swi vona.

¹⁵⁸ Kutani, namuntlha, Xikwembu lexiya xi nga vulavula hi nguva leyi xi le ka mbono xi ri karhi xi endla leswi Xi nga vula leswaku Xi ta swi endla, nakona va pfalekile mahlo swonghasi kuva va nga swi vona. Valava hi lava nga pfumeriki. Va huma va famba kutani va ku, “Oho, ndzi ngaka ndzi nga pfumeli swilo swo tani hi Sweswo. A ndzi se tshama ndzi swi twa Sweswo evuton’wini bya mina!” A swi endli ku hambana eka leswi mi nga swi twa. Bibele yi vurile leswaku Swi tava kona, nakona i Rito ra Yena.

¹⁵⁹ A va se tshama va swi twa Sweswo, na swona, kambe a Swi ri kwalahaya hilaha ku fanaka. Wa vona? Hi swona sweswo. A vari lava nga pfumeriki.

¹⁶⁰ Ntsena tani hilaha Evha a ri xiswona, a ri mukhongeri swinene, hakunene, swingaleswi, kambe a—a nga ri pfumeli Rito

ra ntiyiso. Kutani a fanele ku tiendlela vukhongeri, swingaleswi u endlile matluka nyana ya nkuwa, wa vona, kambe a swi nga ta tirha. *Vukhongeri* swi vula “xifunengeto.”

¹⁶¹ Kayini u endlile nchumu wun’we. Kayini a nga pfumeli leswaku Sweswo a swi lulamile. U te, “Xikwembu xa kwetsima, Xikwembu xi tengile, nakona Xikwembu xi sasekile. Swingaleswi ndzi ta tikumela swiluva, kutani ndzi ta teka e—e swiluva kutani ndzi endla leyo xonga, altari ya kahle, nakona ndzi ta—ndzi ta kombisa xichavo xa mina eka Xona. Ndzi fika emahlweni ka yona, kutani ndzi khinsama emahlweni ka Xona ivi ndzi gandzela Xikwembu xexo. Nakona ndzi ta tlhandleka swiluva e altarini, hikuva, ma swi tiva, tata wa mina na manana va dyile maapula, mihandzu nyana, entangeni wa Eden, kutani walowo hi wona nchumu lowu nga ndzi hlongorisa. Swingaleswi, hi leswaku, ndzi ta tlhelela endzhaku, hikuva ndzi ta swi endla swi saseka. Xikwembu xi ngaka xi nga landzuli kereke ya mina leyikulu. Hikokwalaho ka yini, yi tava yi ri kereke leyi kulukumba ngopfu! Ndzi ta yi endla yi xonga ku kondza yi koka rinoko ra Xikwembu.” Sathana hi yena loyi a tshamaka eka leswo saseka. Sweswo hi leswi Matsalwa ya swi vulaka.

¹⁶² Xexo hi xona xivangelo, nkarhi wun’wana, wansati wo xonga i xikwa ya Sathana. Loko ntsena a nga kuma wansati, a nga ha soholotela vavanuna votala etiheleni ku tlula hilaha a nga swi endlaka hi tindhawu ta byala hinkwato etikweni. Hi swona sweswo. Wa vona? Kumbe, wo saseka, wanuna un’wana wo saseka loyi a nga ta—a nga ta yima eka ntiyiso wa vununa bya yena, wa vona, nakambe, a nga ha hoxa vavasati eka javulosi, na ku va yisa etiheleni. Ina, nkulukumba.

¹⁶³ Xiyisisani, Sathana u tshama eka swo saseka. Xana u ringetile ku endla yini eku sunguleni? Ku endla mfumo wo saseka ku tlula leswi wa Mikael a wuri xiswona; a kongoma eN’walungu, kutani a teka mbirhi xa nharhu wa Tintsumi a famba na tona.

¹⁶⁴ Xana ma swi vona leswaku a ri n’wana wa mani—mani yaloye eku sunguleni, a ri na ntumbuluko luwa endzeni ka yena? N’wana wa Sathana. Kunene, a swi ri tano. Sweswi u akile altari, ivi a khinsama ehansi kutani a gandzela. U hundzile eka hinkwaswo leswi (Kayini) Abel a nga swi endla.

¹⁶⁵ Kambe Abel a swi tiva leswaku a ku ngari sweswo. U... A kuri ngati leyi yi nga va hlongorisa. A swi tiva leswaku sweswo a kuri swona. A kuri swa masangu, ngati. Swingaleswi u tekile xiharhi lexintsongo, kutani a xi nyikela ehenhla ka ribye, kutani a xi tsema nhamu.

¹⁶⁶ Xiyisisani Kayini, u... Xikwembu xi n’wi byerile, Xi ku, “Hikokwalaho ka yini u nga gandzeli ku kotisa makwenu wa wena, kutani u tava kahle. U ta endla kahle loko wo endla sweswo.” Kambe, ee, a tiva ku tlula mpimo mayelana na swona.

Wa vona, u arile ra xiviri, Rito leri tiyisisiweke. Loko valava va ngari vana va yena namuntlha! Wa vona?

¹⁶⁷ Sweswi vonani, “Xikwembu xi vurile vumbhoni,” ku vurile Bibele. Vaheveru ku avanyisa ka vu4, kumbe ku avanyisa ka vu11, “Xikwembu xi vurile vumbhoni bya nyiko ya Yena, leswaku a lulamile.” Xikwembu xi tiyisisile gandzelo ra yena. Xikwembu xi endlile vumbhoni leswaku sweswo a kuri leswi Xi nga swi amukela; rero a kuri Rito ra Xona, kungu ra Xona.

¹⁶⁸ Kutani xi byerile Kayini, xi ku, “Endla nchumu wun’we, kutani u hanya.” Kambe xana mi ehleketa leswaku a ta, a ta tshika mianakanyo ya yena? Ee, nkulukumba. A ri loyi a nga pfumeriki, kutani u humile a famba. Hi swona sweswo. Kayini u endlile nchumu lowu fanaka. Nimrod u endlile nchumu lowu fanaka. Lava nga pfumeriki! A nga pfumeli.

Beltexatzar, nchumu lowu fanaka, hambi leswi, kumbe . . .

¹⁶⁹ Nebukadnetsar, hambi leswi a ri na Daniel tani hi xikwembu xa yena, u n’wi vitanile Beltexatzar, lexi a xi ri xikwembu xa yena, a vona Daniel a endla mintirho leyikulu ya Xikwembu. Kutani a swi tiva leswaku—leswaku Beltexatzar a pfumela, kumbe Daniel ya loye a ri xikwembu, swingaleswi u n’wi endlerele xifaniso, kutani a xi veka le handle na ku endla leswaku munhu un’wana na un’wana a xi gandzela, na swin’wana. Wa vona, mfumo wa Vamatiko wu nghenile hi ku sindzisa ka ku gandzeriwa ka wanuna wo kwetsima, na swona mfumo wa Vamatiko wu huma hi ku sindzisa ka xifaniso xa wanuna wo kwetsima, wa vona, i ndlela yin’we.

¹⁷⁰ Kutani a kuri na voko leri nga tsala ekhumbhini, ka tindzimi leti nga tiviwiki, eku sunguleni ka mfumo wa Vamatiko, laha a kuri hava loyi a ta ku hlaya handle ka muprofeta. Na swona kuna ku tsariwa ekhumbhini namuntlha, hi swona sweswo, “Ichabod,” leswaku ku kwetsima ka Xikwembu ku sukile eka swilo sweswo. Kutani ku tsariwa ku le khumbhini nakona ku nga ha hlaiya hi miehleketo ya ximoya leyi yi pfumelaka swilo swa ximoya, leswi swi nga tswarewa hi Moya wa Xikwembu.

¹⁷¹ Beltexatzar wa khale u huma a ya teka mindzheko leyi ya Hosi, ku ta nwela vhinyo eka yona. Hikokwalaho ka yini? A ri loyi a nga pfumeriki. A ehleketa leswaku a ri mupfumeri, kambe a ri loyi a nga pfumeriki. Wa vona, hi sweswo, u tsan’wile Rito.

¹⁷² Akab, a ri loyi a nga pfumeriki, hambi leswi a—a endla ingaku a nga tano. Ee, ee, a ri exikarhi ka vapfumeri, kambe a ri loyi a nga pfumeriki. Xana u endlile yini? U tekile muphahli, kutani a byi tisa, vuphahli, a byi nghenisa eIsrael. A ri loyi a nga pfumeriki. Ha swi tiva sweswo.

¹⁷³ Va ala kuva Rito ra Xikwembu hinkwaro ri ri ntiyiso. Loyer a nga pfumeriki i tano, wa vona, sweswi tsundzukani, hi yena mukanganyisi. Nakona u—u tikhomisa xisweswo, u vula leswaku wa Ri pfumela, kambe wa Ri ala. U te, “Kunene, swonghasi

swa Rona swi kahle.” Kambe loko hinkwaswo ka swona swi nga lulamanga, kutani sweswo swi n’wi endla loyi a nga pfumeriki. U fanele ku pfumela nhlokomhaka yin’wana na yin’wana na yota yin’wana na yin’wana, na hinkwaswo leswi nga vuriwa Kwalahaya. Ri fanele kuva ntiyiso. Loko Ri ngari ntuyiso, loko u vula sweswi leswaku, “A ndzi pfumeli Sweswo,” kunene, kutani u loyi a nga pfumeriki.

¹⁷⁴ Kuna nakulorhi loyi a nga ndzi byela, nkarhi wun’wana, e—e muministara a ku, “A ndzi na mhaka, Nkulukumba Branham, leswaku i vanhu vangani lava u nga va tisaka lava—lava u vulaka leswaku va horisiwile, a ndzi nga swi pfumeli.”

¹⁷⁵ Ndzi ku, “Kunene u nge swi koti, u ngaka u nga swi pfumeli. U loyi a nga pfumeriki. A swi ngari swa wena. I swa vapfumeri ntseña.”

¹⁷⁶ Mi fanele ku Ri pfumela. Wa vona? Nakona a va Ri pfumeli. Swingaleswi loko mi vona munhu a ri eka sweswo, kunene Paul u vulavurile hi vaprofeta, a vula leswaku va tava “lava nga yingisiki, lava va tikurisaka, lava va rhandzaka ku tsaka ku tlula Xikwembu; va ni ngohe ya vukhongeri, kambe va ala Matimba ya byona, Matimba ya Rito; fambela ekule na lavo tano.” Xiyisisani, va ala Rito hinkwaro, kambe hi xivumbeko xin’wana na xin’wana i vakhongeri. Hi lava va nga pfumeriki eka Rito ra ntuyiso, hambi loko Ri tiyisisiwile.

¹⁷⁷ Hinkwako eka nguva yin’wana na yin’wana, Xikwembu xi tiyisisile Rito ra vanhu lava ndzi nga vulavula hi vona, Nowa, na ku rhelela eka Muxé, na vaprofeta hinkwavo, na van’wana. Xikwembu xi vulavurile hi leswi nga henhla ka ntumbuluko na ku tiyisia Rito, nakona hambi swi ri tano vanhu lavaya va humile va famba va Ri siya.

¹⁷⁸ Kutani hi lava vadyondzisiwa va nga yima lahawani, lava makume nkombo, nakona va hlalerile Yesu a endla swilo leswi A nga swi endla, na ku tiva Matsalwa, na kuva Yena a va byela leswaku liya a kuri nguva leyi leswi a swi fanele ku humelela. Kutani loko A vurile swin’wana, “N’wana wa munhu! Xana mi to yini?” Loko A sungula ku va byela hi ku phemiwa ka xinkwa, na swin’wana, kutani a ya emahlweni na ku va byela hi leswikulu, swilo swa ximoya.

Kutani va ku, “Oho, mhaka Leyi ya nonohwa!”

¹⁷⁹ Yena a ku, “Xana mi to yini loko, N’wana wa munhu, mi N’wi vona a tlhandlukela eTilweni laha A humaka kona?” A ku, “Xana i nyama, kumbe i Moya, lowu hanyisaka-ke?” Wa vona?

¹⁸⁰ Hi loko va suka va famba, va ku, “Oho, Sweswo, ee, ndzi ngaka ndzi nga swi pfumeli Sweswo.” Wa vona? Va suka va famba, va siya Rito. Va ngaka va nga kali va tshamela ku vona leswaku ku humelela yini. Yaloye hi—yaloye hi loyi a nga pfumeriki.

¹⁸¹ Vona, xana va endla yini manuku? Hi kuma leswaku vona, leswaku vanhu lava, vapfumeri lava, lava tivitanaka vapfumeri, kambe hi nghohe ya vukhongeri, nakona va tsandzeka ku vona Ntiyiso lowu nga tivisiwa wa Rito ra Xikwembu hikuva Wu lwisana na leswi va swi pfumelaka. Wa vona?

¹⁸² A swi endli ku hambana leswaku mi pfumela yini, hilaha mi nga tshembheka hakona, hilaha mi nga vakhongeri hakona, kumbe, sweswo swi hava na xin'we xo swi endla eka swona. Ku tshembheka, hikokwalaho ka yini, sweswo swi hava nchumu xo xi endla na swona. Ndzi va vonile vanhu vo tshembheka swonghasi! Ndzi vonile vahedeni va hisa swihlangi swa vona, va va phamela eka tingwenya, vamanana na vana va vona. Sweswo swi tlula leswi Mukreste a nga swi endlaka. Wa vona? Va pfumela hi ku tshembheka, hi ku tshembheka, kambe hi tshembheka hi ku hoxisa.

¹⁸³ Vanhu va ri, “Kunene, kereke leyi yi yimile!” Sweswo, mi tshembheka hi ku hoxisa, loko kuri ku yi hambana na Rito. “Kunene, sweswo langutisa, a ndzi pfumeli eka nchumu wo tani hi walowo!” Loko, Bibele yi vurile leswaku Swi tano, hambi swi ri tano! Wa vona? “A ndzi pfumeli leswaku hi fanele ku endla *Leswi*.” A ndzi na mhaka na leswi u ehleketa ka leswaku a wu fanelanga ku swi endla. Xikwembu xi vurile leswaku swi fanele ku endliya.

¹⁸⁴ “Masingita lawa ya ta va landzela.” Ku fika kwihi? “Emisaveni hinkwayo.” Mani? “Eka xivumbiwa xin'wana na xin'wana.” Wa vona, swi tava tano! Ku ngari, “Kuva tano?” Swi ya eku endlekeni!

¹⁸⁵ Kutani Hungu leri ra awara leri hi tiphinaka hi rona sweswi, Vukona bya Xikwembu, siku ra ximanguva lawa, nkarhi wa ni madyambu loko Mavoni ya ri karhi ya voninga, na swilo leswi nga lemuriwa, na Rito leri nga tiyisisiwa na ku khorwisiwa kuva ri ri Ntiyiso; ha vumbirhi ku profetiwa, swi humelela, hinkwaswo hi xisayense na hinkwaswo, swi khorwisa leswaku hi Rona, “Yesu Kreste loyi a nga yaluya wa tolo, na hilaha ku nga heriki.” Kutani, munhu u huma a siya Sweswo, hi yena—hi yena loyi a nga pfumeriki. U le kule na ku tshembha. U titivatiwile hi matimba ya Sathana, swingaleswi ku hava ku tshembha eka yena. U le kule na ku tshembha.

¹⁸⁶ Sweswi xana sweswo i yini? Mupfumeri; sweswi loyi a nga pfumeriki; sweswi ntlawa wa unharhu, lowu hi vulavulaka hi wona, i mupfumeri wo tiendlisa. Yaloye i mufana, mupfumeri wo tiendlisa! Sweswi, tsundzukani, kwallahaya ku yimile leyi nharhu hinkwayo. Sweswi, ha swi kuma sweswi, va endla tani hilaha tatana wa vona a endlaka hakona, Yudas.

A kuri na Petro na vaapostola lavan'wana, vapfumeri.

A kuri na lava makume nkombo, lava nga pfumeriki.

¹⁸⁷ Nakona a kuri na Yudas, a nembelerile kwalahaya, a ri mupfumeri wo tiendlisa. Xana va endla yini? Lowu i muxaka lowu khemelelaka ku kondza wu kuma xa n'wanchumu, xo biha eka Swona. Nkarhi hinkwawo va languterile ku kuma ximbhovana, ku vona hilaha swi endliwaka hakona, ku vona loko kuri ku i mano, loko kuri ku i salamus. Va yimele ku xaviwa. Va languterile sweswo.

¹⁸⁸ Loyi a nga pfumeriki, a nga kali a yimi-yima. Wa Swi sola, kutani a huma a famba.

¹⁸⁹ Mupfumeri, a swi na mhaka leswaku ku humeleta yini, wa Swi pfumela, hambi swi ri tano, hikuva hi Rona Rito.

Hi yaleyo mintlawa ya n'wina yinharhu.

¹⁹⁰ Loyi a nga pfumeriki wa khale u ta huma a famba, eka nchumu wo sungula lowu vuriwaka, lowu a nga wu tsakeriki mayelana na swona. Makwerhu, u ta humesela muhlovo wa yena ehandle hi nkarhi walowo. Hi loyi a nga pfumeriki. Paul u te, "Va humile exikarhi ka hina, hikuva a va ngari va hina, eku sunguleni. Va sungurile na hina." "Oho, u tsutsumile kahle; xana i yini xi nga ku tshimbisa?" Wa swi vona? "Va humile, hikuva a va ngari va hina." Loko va vona Rito ri ri karhi ri ya emahlwemi hi ku hetiseka, hikokwalaho ka yini, a va lava ku kuma salamusleri a va ta tirha hi rona. Wa vona?

¹⁹¹ Kambe vapfumeri va xiviri a va vutisi nchumu. Ku tsariwile eRitweni, nakona va Ri pfumela, kutani va ya emahlwemi. Hi sweswo. Nkarhi hinkwawo, ku tsariwile. Loko ku nga tsariwanga, hikokwalaho ka yini, u fambela ekule na swona, swi ngari na mhaka leswaku ku humeleta yini. Ku fanele kuva ku tsariwile. Wa vona? Nakona va ri vona Rito leri tsariweke nakona va Ri pfumela. Nakona va xi vona Xikwembu xi ri karhi xi famba eRitweni ra Xona, va vona awara, Hungu, nkarhi, nakona va famba na Rona.

¹⁹² Tani hilaha ndzi nga vula hakona mixo lowu, hilaha Pilato wa khale a nga vaka a famble ehansi, ni vusiku, na ripfalo ra yena ro vilela, a ri karhi a ringeta ku tibasisa. Kutani u swi virile, mina, laha ehandle ko kanakana a nga huwelela ni vusiku, a ku, "Ndzi—ndzi—ndzi—ndzi hlambile swandla swa mina, vusiku hinkwabyo, kambe na sweswi a ndzi swi twisisi. Wa vona, a swi basanga. Ndzi ngaka ndzi ngayi ndzi ya hlangana na Yena; ndzi na Ngati eswandleni swa mina." Oho, mina! Wa vona, mi nga tshuki mi va na nandzu wa sweswo. Wa vona?

¹⁹³ Yi le swandleni swa hina. Kuna ndlela yin'we ntsena yo Yi susa; leyi nga, ku Yi amukela, hi swona sweswo, u hundzuka xiphemu xa Yona. Sweswo hi leswi Yi nga halateriwa swona.

¹⁹⁴ Sweswi, mupfumeri wo tiendlisa u tshamelela kwalano na ku tiendlia mukhongeri hilaha a nga kotaka hakona, kambe le makorhwени ya mbilu ya yena u le ku ringetenka ku kuma leswi—leswi, n'wina, hilaha mi swi endlisaka xiswona. Oho,

loko tiko ri nga talanga hi xiphemu xexo, xa vakanganyisi! Ina. Yaloye i Yudas. Sweswo hakunene hi swona. U tshamelela kwalano, a hundzuka xiphemu xa ntlawa; a ri mukhomu wa nkwama, wa vona. U yima-yima kwalahaya, nkarhi hinkwawo u tshama a humesele voko ra yena ehandle hikwalaho ka mali. U nga swi vona leswaku, nchumu wun'we, u tshamela ro njovela mali, na ku humesela voko ra yena ehandle hikwalaho ka leswi. Nakona i mupfumeri wo tiendlisa. U tikhoma tani hi mupfumeri, kambe emakorhweni ya mbilu ya yena . . .

¹⁹⁵ Ma swi tundzuka, a nga phuntisi Yesu. Endzhaku ka loko lava makume nkombo va fambile, kutani vapfumeri va tekile tlhelu ra vona; kutani u hundzulukerile eka vapfumeri, A ku, "Ka hari na un'wana exikarhi ka n'wina," hikuva u te, "Ndzi hlawurile khume mbirhi, kasi un'wana wa n'wina i javulosi." Yesu a swi tiva, ku sukela eku sunguleni, hikuva A ri Rito. A tiva xihundla xa le mbilwini.

¹⁹⁶ Hilaha a swi nonohwa hakona! Yimani nyana. Ehleketa nihi vuenti, nkarhi wo leha, hi ku lulama! Hilaha swi nga vaka swi nonohwile hakona eka Yena, ku famba kwalahaya, na wanuna a ri karhi a N'wi vula, "Makwerhu," a ri karhi a swi tiva nkarhi lowu hinkwawo leswaku a ri mukanganyisi loyi a ta ringeta ku N'wi khunguvanyisa, na ku N'wi xavisela makume nharhu wa swiphemu swa silivhere. Hilaha a swi nonohwa hakona kuva a swi khoma exifuveni xa Yena, kutani munghana wa Yena a ri karhi a famba kwalahaya. Hambi A virile leswaku, "Munghana," a vitana Yudas munghana wa Yena, "xana a Ndzi ngari na wena, nkarhi lowu hinkwawo?" A swi tiva embilwini ya Yena, nakona a nga ta swi vula. A swi tiva, ku sukela eku sunguleni, leswaku a kuri mani loyi a ta N'wi xenga.

¹⁹⁷ Hi luya mupfumeri luya wo tiendlisa a nga rindzela. U ta yimbelela sweswo, a ku, "Oho, ndzi pfumela *leswi*, nakona ndzi pfumela *leswi*, nakona ndzi pfumela *leswi*. Kambe, oho, ma swi tiva, ndzi twile munhu un'wana a ku i ka *swingere-nge*re." Oho, wa vona, ntsena tindleve to leha.

¹⁹⁸ Mupfumeri wa xiviri a nga twi nchumu handle ka Rito. Hi sweswo ntsena. U langutisa Rito. A nga langutelanga swimbhovana. A nga langutelanga masalamusi. U pfumela Xikwembu, nakona sweswo swa swi tshamisekisa, nakona u tshamela ro ya emahlweni. Wa vona? Hi yaloye mupfumeri.

¹⁹⁹ Loyer a nga pfumeriki u tala hi minete, kutani a ngaka a nga swi tshameli ku yingisa khume ra timinetse ta Hungu. U fanele ku tlakuka a huma a famba. Ri lwisana na mukhuva wa yena, nakona a ngaka a ngavi na swin'wana swo swi endla na rona, swingaleswi u huma a famba.

²⁰⁰ Kutani, mupfumeri wo tiendlisa u tshamelela kwalahaya, luya Yudas. Wa vona, yaloye i muxengi. Yaloye i—yaloye i xikelema, loko ndzi fanelerile ku vula rito lero. Yudas,

u tshamelela kwalahaya. Lowu i nkarhi, nkarhi wun'wana, vapfumeri lava vo tiendlisa va tiveka swinene eka vanhu. Hi swona sweswo, vapfumeri lava vo tiendlisa, wa vona. Van'wana va vona i vanhu va matimba, vo dyondzeka, digiri ya vudokodela, muholo lowukulu, na hinkwaswo. Van'wana va vona i vanhu va kahle, va mano, ntsena tani hilaha vana va Sathana a va tava hakona.

²⁰¹ Langutisani hilaha Sathana a teke kwalahaya kutani a pfumelelana na xiphemu xin'wana na xin'wana xa Rito lero; u yimerile ntsena ku kuma xivandla lexo tsana eka Evha, laha a nga ta kombisa matimba ya yena yo n'wi xissa, ku ta n'wi xenga. Yaloye a kuri—yaloye a kuri Sathana. Kutani lahawani Sathana u, hi xivumbeko xa Yudas, eka nguva yaleyo. Luya a kuri Sathana eka nguva yo sungula. Xana a ri yini? A pfumelelana na Rito ku fika eka nchumu wun've lowuntsongo; u le ku ringeteni ka ku kuma ndhawu leyi a nga ta kuma ku tsana.

²⁰² Nakona sweswo hi leswi Yudas a swi kumaka sweswi. U ta ta kahle na nhlengeletano, kutani a halahala hinkwako ku kondza akuma xivandla lexintsongo lexi, yena, “Oho, hi lexiya! Hi xona lexiya!” Wa vona? “Oho, hi yona ndlela leyi swi endlisiwaka xiswona!” Wa vona? Hakunene sweswo hi swona.

²⁰³ Votala va n'wina ma tsundzuka le henbla vusiku lebyiya loko wanuna luya a tava a tile eka platifomo. A ehleketa leswaku kuna ku hlaya ka miehleketo ya ku hlaya makhadi ya xikhongelo, na hilaha a ehleketa leswaku u swi kumile hi nkarhi luwa. Makwerhu, a—a khorwile leswaku u swi kumile. Kutani u tile kwalahaya. A wela eka kereke leyi nga pfumeriki eka—eka—eka leswi, eka Evhangheli, Evhangheli leyi heleleke. Kutani u tile eka platifomo. A ndzi karhele. A va lunghisela ku ndzi yisa ekule.

²⁰⁴ Kwalano a kuri eWindsor, Ontario. Kwalahaya, a ta ku tsemakanya ku suka—ku suka e United States lahaya, ku tsemakanya ku suka eDetroit, eWindsor, odithoriyamu leyikulu.

²⁰⁵ Kutani wanuna loyi u tile kwalahaya a ambarile suti ya mpun'wa, na thayi yo tshwuka, wanuna wo languteka a tlharihile, a xalamukile ku kotisa xipikiri. U tile eka platifomo. Kutani ndzi . . . U tile. Kutani ndzi ku, “Kunene, u nge ndzi vona voko ra wena.” Ndzi ku, “Ndzi karhele; ndzi vonile swivono swo tala swonghasi. Ntsena u nge ndzi vona voko ra wena.” Nakona—nakona a ndzi kalanga ndzi n'wi lemuka wanuna. Kutani a tlhandleka voko ra yena ehenhla ka ra mina. Kutani ndzi ku, “Nkulukumba, ku hava leswi nga hoxeka hi wena. Yana emahlweni.”

A ku, “Oho, swi kona, na swonavu.”

²⁰⁶ Kutani ndzi ku, “Kunene, u nge ndzi vona kwalano.” Ndzi ku, “Ee, nkulukumba, ku hava na xikombiso na xin've. Ee, nkulukumba, u munhu loyi a nga hanya kahle.”

A ku, “Famba u ya langutisa eka khadi ra mina ra xikhongelo!”

²⁰⁷ Ndzi ku, “A ndzi na mhaka na leswi u nga swi veka eka khadi ra wena ra xikhongelo.” Ndzi ku, “A ndzi na swo swi endla hi khadi ra xikhongelo,” ndzi ngari eku ehleketeni, ma swi vona. A ndzi karhele na ku hlakala. Kutani mina... Kambe tintswalo ta Xikwembu, ma swi vona, a ta hari kona.

²⁰⁸ Mi tsundzuka, loko Xi mi rhumela, i vutihlamuleri bya Xona ku mi hlayisa. A hi bya mina; i bya Xona. Xi Swi rhumerile. Ntsena ndzi fanele ku yima ehenhla ka leswi na ntiyiso.

²⁰⁹ Loko Muxe a hoxile nhonga ya yena ehansi, yi hundzukile nyoka, nakona vangoma va endlile nchumu wun’we, xana Muxe a ta endla yini handle ka ku yima kwalahaya na ku rindzela tintswalo ta Xikwembu? Hi sweswo ntsena. Nchumu wun’we. U landzelerile milawu. Kutani ma swi tiva leswi nga humela, a mi swi tivi? Wa vona?

²¹⁰ Wanuna loyi a ku, “Sweswi,” a ku, “swi kona. Langutisa khadi ra mina ra xikhongelo.”

²¹¹ Ndzi ku, “Kunene, u ngava u vile na ripfumelo ro tala, kutani ri ngava ri swi endlile,” ndzi ngari eku ehleketeni, wa vona. Ndzi endlile... ndzi ngari eku swi tekeleni enhlokweni.

²¹² Kutani u fasunurile bajji ra yena kutani a humesela xifuva xa yena ehandle. A ku, “Hi sweswo!” eka vayingiseri.

Kutani ndzi anakanya, “Xana ku humelela yini laha?”

²¹³ U hundzukile. A ku, “Hi sweswo!” Aku, “Ma ri vona salamus?” Yaloye i Yudas wa n’wina, wanuna wa mukhongeri, muchumayeri wa dinominexini leyikulu. A ku, “Hi sweswo! Ndzi vile na ‘ripfumelo ro tala swonghasi.’ Sweswi, u tsanile swinene, a nga ha swi koti na ku hlaya miehleketo. Wa vona, a swa ha ti eka yena.” Kutani kwalahaya a ku, “A hi kuva ripfumelo ra mina ri vile lerikulu swonghasi.” A ku, “Ndzi swi tsarile sweswo eka khadi ra xikhongelo, nakona sweswi a nga swi koti ku swi hlaya, ma swi vona.” A ku, “Isalamusi lero!”

²¹⁴ Kutani ndzi anakanya, “Xana ku humelela yini?” Kutani tintswalo ta Xikwembu ti xikela ehansi.

²¹⁵ Ndzi ku, “Nkulukumba, hikokwalaho ka yini javulosi a swi vekile embilwini ya wena ku xenga Xikwembu?” Yudas wa ximanguva lawa! Ndzi ku, “U wa church of Christ...” Ndzi khomeleni. Kunene, ndzi swi vurile. “U muchumayeri wa church of Christ. U wela eka church of Christ, ku suka e United States. Na swona wanuna loyi a nga tshama kwalano a nga ambala suti ya wasi, na nsati wa wena na nsati wa yena lava nga tshama kwalano, a mi tshamile etafuleni vusiku bya tolo leri a ri tlhandlekiwile nchumu wa rihlaza ehenhla ka rona, e—e vuandlalo byo kota *lebyi*, kutani u makelerile leswaku leswi i ‘ku hlaya miehleketo,’ nakona a wu ri ekuteni vusiku lebyi.”

²¹⁶ Wanuna luya a tlakuka. A ku, “Walowo i ntayiso wo tshembheka. Xikwembu, ndzi tsetseleli!”

²¹⁷ Ndzi ku, “Nkulukumba, u vekerile ‘TB na mfukuzani’ eka khadi lero, kutani sweswi u na swona. I swa wena sweswi.”

Hi loko a ndzi ombo hi nenge wa buruku, a ku, “A ndzi nga . . .”

²¹⁸ Ndzi ku, “Ndzi ngaka ndzi nga ku pfuni. Wena yana emahlweni. Sweswo swi le xikarhi ka wena na Xikwembu. U titsalerile khombo ra wena eka khadi ra wena.” Nakona sweswo swi n’wi khomile. Sweswo a kuri hinkwaswo ka swona.

²¹⁹ Wa vona, vapfumeri vo tiendlisa, vaxengi, va ri karhi va ringeta ku kuma xihoxo hi Xikwembu na Rito ra Xona. Valava i Vayudas. Valava hi vona. Ma swi vona leswaku Yudas u humelerise ku yini? Ma swi vona leswaku nakulorhi luya u humelerise ku yini? Hi yona ndlela leyi mupfumeri wo tiendlisa a humelalaka hakona. Wa vona, vapfumeri vo tiendlisa, oho, va dyondzekile ngopfu, nkarhi wun’wana, nakona mphikizano lowukulu wu va kona exikarhi ka Rito na mikhuva ya vona. Kutani, loko wu va kona, va tixavisela eka dinominexini ya vona ntsena tani hi murhangi wa le mahlweni wa vona a nga endla hakona, Yudas. Yudas u tixaviserile eka dinominexini ya yena; a xavisa Yesu, Rito, eka dinominexini ya yena, kutani a xenga Yesu Kreste endzhaku ka loko a koxile kuva a ri xiphemu xa swona.

²²⁰ Tiministara nkarhi wun’wana ti koxa kuva malandza ya Kreste, kutani loko Rito ri tivisiwa hi ku hetiseka kuva ri tiyisisiwile eka siku lero, leswaku i Hungu ra awara yaleyo, kutani va tixavisa kwalahaya hikokwalaho ka ndhuma, eka dinominexini ya vona; ntsena tani hilaha Yudas a nga endla hakona, a xenga Yesu eka Vafarisi na Vasaduki. Moya walowo a wu fi, swingaleswi kwalahaya wu le xikarhi ka vapfumeri, vapfumeri vo tiendlisa, na lava nga pfumeriki. Wa vona, sweswo swi tano, u tile a ta xavisa Yesu hikokwalaho ka swiphemu swinharhu swa silivhere; na swona vavanuna votala va ta swi endla namuntla hikokwalaho ka thikithi ra swakudya, hikokwalaho ka dzana ra tidolara tin’wana to tatisa hi vhiki; hi swona, va ala Xikwembu lexi nga yima exikarhi ka vona, lexi nga xava vutomi bya vona, nakona hi Rito leri nga helela.

²²¹ Nakona va ta ku, “Oho, masiku ya mahlori ya hundzile!” kumbe, “Xikwembu a xi lavi nchumu wo tani hi walovo namuntla.” Wa vona? “Oho, ndzi pfumela eka Yesu Kreste, N’wana wa Xikwembu! ‘Hi losa Maria, mana wa Xikwembu, u katekile exikarhi ka vavasati!’” Swilo leswin’wana hinkwaswo leswi va swi vulaka! Kutani van’wana va vona va te, “Ndzi pfumela eka Mikhuva ya Apostola. Ndzi pfumela eka Xikwembu Tatana, wa Matimba hinkwawo, Mutumbuluxi wa tilo na misava. Ndzi pfumela eka kereke ya Roman Khatholiki yo kwetsima, na swilo leswi hinkwaswo.”

²²² Ndzi byeleni leswaku hi rini laha muapostola a nga tshama a va na mukhuva wo tani hi walowo. Loko vaapostola va vile na mukhuva wun'we, wu tsariwile eka Mintirho 2:38, "Hundzukani kutani mi khuvuriwa, un'wana na un'wana wa n'wina, hi Vito ra Yesu Kreste, eku rivaleriweni ka swidyoho, kutani mi ta kuma nyiko ya Moya lowo Kwetsima." Loko kuri na mukhuva wokarhi eka vona, a kuri walowo. A va ngari na mukhuva. A kuri Rito. Walowo i ntiiyiso. Wu tshama wa hari lowu fanaka. Xexo i xileriso xa ku tshunguriwa ka vuvabyi bya xidyo, "Kutani mi ta kuma nyiko ya Moya lowo Kwetsima! Hundzukani kutani mi khuvuriwa eku rivaleriweni ka swidyoho, wa vona, kutani mi ta kuma nyiko ya Moya lowo Kwetsima."

²²³ Kambe va tixavisa, ku kotisa Yudas. Yaloye i mupfumeri wo tiendlisa. Van'wana va vona i vanhu lava nga nyikiwa swinene. Kutani mupfumeri loyi wo tiendlisa, langutani nakulorhi yaloye. Yaloye i nakulorhi wa mano. Nakulorhi lontsongo loyi a talaka hi xihatla, kutani a tlulela ehenhla ivi a tsutsuma a famba, hikokwalaho ka xivulwa xin'wana na xin'wana lexi a nga xi tsakeriki, mi nga n'wi tekeli enhlokweni; o va ntsena loyi a nga pfumeriki, xo sungula. Kambe loko mi vona nakulorhi loyi, mupfumeri wo tiendlisa, wa khomelela, wa vona, yaloye i Yudas. Hi yena yaloye.

²²⁴ Ku kotisa tinyiko ta kahle. Ndzi ya eku vuleni ka mavito lahawani. Leswi, kunene a ndzi nga fanelanga ku swi endla, kambe ndzi ya eku ma vuleni, hambi swi ri tano, leswaku mi ta swi tiva. Tani hi, Elvis Presley, Red Foley, Ernie Ford, Pat Boone. Elvis Presley, Mupertekostal; Pat Boone, wa church of Christ; Red Foley, mudiyakoni eka church of Christ; na swona ndzi ehleketa leswaku Ernest Ford i Mumethodist. Na hinkwavo vanhu lavaya va nga na tinyiko letiya, vo tlhariha, lava humaka eka thelevhixini. Kutani vanhu va ri, "Kunene, kasi a hi vakhongeri? Va yimbelela tinsimu." Sweswo a swi vuli nchumu. Ina, nkulukumba. Ku hambukisa misava!

²²⁵ Xana va kuma yini eka swona? Yudas u kumile swiphemu swa makume nharhu swa silivhere. Elvis, nkumbi wa Ticadillac, na dzana, kumbe ma mbirhi, dzana na ntlhanu wa mamiliyon i ya tidolara, kumbe miliyon i ra tidolara eka tirhekodi na swilo swo kota sweswo. Pat Boone na lavan'wana. A ndzi na mhaka na leswaku va wela eka kereke yihi, na hinkwaswo, i vukanganyisi. I vupfumeri byo tiendlisa. I matikhomela ya vunwa. Lero, vutomi bya vona bya swi khorwisa, leswaku a byi lulamanga. Hi swona.

²²⁶ Kutani kuna lava va nga na tinyiko ta kuva vakondleteri, vutlharhi bya le misaveni. Va chumayela Evhangeli, va koxa tano; vavanuna lava xalamukeke, tintlharhi. Yingisani, wanuna loyi a nga tokota hi tlhelio rero, a hi muchumayeri. Hi yena lekichara. Xexo hi xona xiphijo namuntlha, hi na malekichara.

²²⁷ Yesu a nga kalanga a ku, "Fambani mi ya tokotela ku endla leswi." U te, "Fambani mi ya chumayela Evhangeli, kutani masingita lawa ya ta landzela ku chumayela." Wa vona? Wa vona?

²²⁸ Sweswo a hi ku dyondza leswaku u ta endla lekichara leri nga ta yima na kuva ntsena, mina, ri vekele swilo swa swiluva eka yona, ku mi endla mi titwa ingaku mi tshamile evukoneni bya ndhuna ya Ntsumi. Sweswo a hi swona. "Va ni nghohe ya vukhongeri," ma swi vona, yaloye i lekichara, ku ngari Moya lowo Kwetsima lowu nga eku tirheni.

²²⁹ Nakulorhi un'wana lontsongo loyi a nga tiviki ti ABC ta yena, a nga ha ta hi Matimba ya ripfumelo eka Rito; kutani a endla leswaku Moya lowo Kwetsima wu endla swilo leswi vanhu va nga swi tiviki, kutani va swi ala. Wa vona? Hi sweswo.

²³⁰ Vanhu lavakulu! Ina, nkulukumba. Kutani, hi vona vakondleteri. Va katekile, va humelerile, va xalamukile hi vutlharhi bya le misaveni.

²³¹ Ntsena tani hilaha Sathana a nga endla hakona eka Evha, lontsongo, wansati loyi a nga koti ku tikhoma. U tile eka wansati kutani a ringeta ku n'wi xavisa eka mianakanyo leyi a yi tava yi tlharihile ku tlula leswi wansati a ri xiswona, nakona sweswo hi leswi wansati a swi languterile. Ematshan'wini yo tshama na leswi Rito a ri swi vula, a—a lava ku xavisa wansati eka mianakanyo ya leswaku a tlhariha, kutani wansati a xava nhundzu ya yena. Nakona va ha endla nchumu wun'we na namuntlha. "Vutlharhi bya misava leyi i vuphukuphuku emahlweni ka Xikwembu." Ina, nkulukumba.

²³² Ee, nkulukumba! Oho, mina, ka hari nchumu wun'we na lowu Vafarisi va nga tixavisa eka wona, na ku endla, wa vona, hi vutlharhi lebyi a va byi tiva. Kambe—kambe va ala Rito ra Xikwembu hinkwaro.

²³³ Loko Ri khorwisiwile hi ku hetiseka nakona Ri tiyisisiwile eka vona, va tama va ha ringeta ku kuma swin'wana, na ku ehleketa leswaku hi Rona salamus. A va tshamisekanga emiehleketweni ya vona. Va ngaka va nga Ri pfumeli. Mi nga va byela swin'wana na swin'wana, kutani va tlhela va vuya nakambe; mi nga va byela swin'wana na swin'wana, va tlhela va vuya nakambe. Nakona ntsena va... Nakona va ngaka va nga Ri nwelerisi endzeni, ma swi vona. Kutani va languteni; va languterile nkarhi, ntsena ximbhovana. Sweswo hi leswi va swi lavaka.

²³⁴ Sweswo hi leswi, loko a ku ngari hikokwalaho ka tintswalo ta Xikwembu, timbhovo ta mina hinkwato a ti tava ti paluxekile, loko kuri ku a ndzi ri na tona. Wa vona? I tintswalo ta Xikwembu, hikuva ku hava timbhovo eRitwени ra Xikwembu; ntsena Evhangeli yo lulama. Ndzi tshamela ku vula, leswaku mani na mani, loko mi ndzi vona ndzi ri karhi ndzi dyondzisa

kumbe ku endla swin'wana leswi nga fambelaniki na Rito ra Xikwembu, tanani mi ta ndzi byela. Hi lowu nchumu lowu funengetaka timbhovo leti mi ringetaka ku ti kuma. Vekani matihlo ya n'wina eka Sweswo, kutani a mi nge voni timbhovo, hikuva ku hava timbhovo.

²³⁵ Sweswi tsundzukani, Yudas a ehleketa leswaku u wu kumile. Nakulorhi luya a ehleketa leswaku u wu kumile. Minkarhi yo tala, va ehleketa leswaku va wu kumile, kambe swi khorwisa leswaku a swi tano. Valava i vapfumeri vo tiendlisa, vakanganyisi. Va Makume nkaye-ntlhanu wa tiphesent eka Rito, leswi Evha na yena a ri xiswona, kambe, makume nkaye-nkaye na nkaye xa khume; kambe a kuri n've xa khume xexo lexi nga vanga rifu na gome.

²³⁶ Walowo hi wona nchumu lowu avanyisaka vandla na swin'wana, hikuva a va teki Rito ra Xikwembu hinkwaro. Valava i vapfumeri vo tiendlisa. Hi kuma leswaku swi vile tano minkarhi hinkwayo, kambe va ala ra ntiyiso, Rito leri nga tiyisisiwa. Lava ve le ka rixaka rin'wana na rin'wana. Ha va kuma loko ti ri karhi ti longoloka, nakona i vakhongeri lavakulu.

²³⁷ Sweswi, Ndzi lunghisela ku pfala sweswi, hikuva ndzi tekile hafu yin'wana ya awara.

²³⁸ Yesu, hi kuma leswaku U hi tsundzuxile hi masiku lawa yo hetelela na vanhu va muxaka lowu, leswaku va ta fana swinene na nchumu wa xiviri, leswaku hakunene va nga hambukisa na vona Vahlawuriwa. Xana i yini sweswo? Valava i Vayudas, e—e vanhu lava va yaka le henhla swonghasi. Langutisani, va—va nga ha rila, va huwelela, va koxa kuva va hlongola madimona, na hinkwaswo, kutani va hundzulu ka ivi va ala Rito. Hakunene. Va na nghohe ya vukhongeri. Ha ka nyngi va nga—va nga—va nga . . .

²³⁹ Langutisani laha Yudas a humaka kona. Moya wa Yudas wu gonyerile endzeni ka Evhangeli, kuya eka ndhawu ya Pentekosta. Kambe loko swi fika eka nkarhi wa nkuvulo wa yena hi Vito ra Yesu Kreste, na swilo leswin'wana leswi fambaka na nkuvulo wa Moya lowo Kwetsima, u humile a famba. U kombisile mihlovo ya yena. Kutani moya walowo wu nga hanya eka tidinominexini letiya ku kondza wu fika eka Ntiyiso walowo, kutani yi tlhelela endzhaku, ku kotisa moya lowu nga ka tona, lowu rhangelaka ku vuya ka tona; ntsena tani hilaha Yohana a rhangerile ku vuya ka Yesu.

“Sweswi u ri, ‘Yesu u vurile leswaku va tava kusuhi ngopfu.’”

²⁴⁰ Sweswi, “Vahlawuriwa,” valava i muxaka lowu nga va na vito ra vona eBukwini, ku sukela emasunguleni, ya Vutomi, lava pfumelaka, kumbe emasunguleni ya misava, lava va pfumelaka Rito hinkwaro ra Vutomi. Valava i Vahlawuriwa.

²⁴¹ Sweswi vonani vanhu lava. Sweswi, ndzi vula leswi hi xichavo na ku xixima, hi rirhandzu ra vukwembu; loko ndzi nga

endli tano, ndzi—ndzi—ndzi lava ku vitana ka le altarini, mina n'winyi. Xiyisisani, Yesu u vurile leswaku va ta hambukisa na vona Vahlawuriwa. Sweswi, valava a ku nga tava Methodist, valava a ku nga tava Baptist; ha swi tiva leswaku hi lava va nga pfumeriki, xo sungula. Kambe, i vandla ra Xipentekosta leri nga tinghenisa eka dinominexini yaleyo, va thala tilayini ta vona, handle ka Rito; va thala layini kutani va vekela vandla ra vona vinyi, na ku biyela Rito ehandle. Va nga hambukisa na vona Vahlawuriwa, lava yelanaka swonghasi! Va ri, “Va rila. Va huwelela. Va tlulela ehenhla na le hansi. Va koxa swikhongelo swo horisa.” Swi tano hi Yudas, nakona swi tano hi lavan’wana hinkwavo. Loko va tava va humile, va vuyile va ri karhi va tlangela na hinkwaswo, nakona va kale va tsariwa na mavito ya vona eBukwini ya Xinyimpfana ya Vutomi.

²⁴² Kambe, tsundzukani, Mutekiwa a nga—a nga—a humi eka ntlawa walowo. U famba hi ku Vutliwa.

²⁴³ Eku Avanyiseni, ku avanyisa a ku vekiwile, “Kutani tibuku ti pfuriwa, lavo biha; na Buku yin’wana, leyi nga Buku ya Vutomi, yi pfuriwile,” kutani a kuri na Mutekiwa kwalahaya wo yi avanyisa. Wa vona? Wa vona? “Buku yin’wana yi pfuriwile, leyi a yi ri Buku ya Vutomi.” Teto i tinyimpfu eka tlhelo lerin’wana, na timbuti eka lerin’wana. Wa vona, vanhu lava nga fa le ndzhaku lahaya, lava va nga kalangiki va kuma nkateko, va tava lava nga hambanyisiwa.

²⁴⁴ Kambe sweswi xiyisisani, “ku hambukisa” na vona Vahlawuriwa, vonani ntlawa walowo. Walowo i ntlawa lowu landzelelaka kwalahaya, “Ina, boti. Haleluya! Ina. Ku kwetsima a kuve ka Xikwembu!” Kutani le makorhweni ya mbilu ya wena wa swi vona leswi va ku tirhelaka swona; va va na wena ekerekenei (hikokwalaho ka yini) kuva u ta koka ntshungu, ku va halatela mali yin’wana na yin’wana leyi va nga ta yi kuma eka swona. U ehleketa leswaku a ndzi swi tivi sweswo? Va nga ha ehleketa leswaku a ndzi swi tivi, kambe ndza swi tiva.

²⁴⁵ Yesu u swi tivile, ku sukela eku sunguleni, leswaku i mani muxengi. Wa vona? Wa vona? Kambe xana U endlile yini? U lo yima ku fikela nkarhi walowo. Sweswo hi leswi hi faneleke ku swi endla nkarhi hinkwawo, ku yima ku fikela nkarhi walowo. Mi nga tifambisi hi n’wexe. Yimani ku fikela minete yaleyo.

²⁴⁶ Va na xi- . . . nghohe, na ku longoloka, walowo i ntlawa luwa wo hambukisa. Langutisani muxengi yaloye, ntlawa walowo kwalano; ku ngari—ku ngari mupfumeri, ku ngari loyi a nga pfumeriki, kambe mupfumeri luya wo tiendlisa. Oho, mina! Xana va le ku endleni ka yini? Ntsena ku hlakula kwalahaya ku kondza va ehleketa leswaku va nga kuma swin’wana, va ri karhi va xokola peni yin’wana na yin’wana leyi va yi kumaka eka vanhu, wa vona, kutani va yi fumba eka mavandla lawa

lamakulu; lawa ya lwisanaka na rona, nakona va swi tiva. Wa vona, va swi tiva.

²⁴⁷ A swi endli ku hambana leswi mi swi vulaka. Nkarhi hinkwawo a va tsundzuxa vanhu va vona loko mi nga se ta, "Mi nga Swi yingisi."

²⁴⁸ Wanuna un'wana, loyi a ri na xitiya nhlana xo yima kwalahaya eOhio, ntseña loko Makwerhu Kidd a horisiwile, a huma a ya eka platifomo, kutani a ku, "Sweswi, Makwerhu Branham i muprefeta, a kuna ku kanakana na swintsongo, loko a ri ehansi ka ntoto. Kambe sweswi," a ku, "loko ntoto wu sukile eka yena," a ku, "mi nga yi pfumeli Dyondzo ya yena, hikuva Yi hoxekile."

²⁴⁹ Kutani a nga swi tivi, leswaku loko ndza ha tshamile ekamareni ya mina, Hosi yi ndzi paluxerile swona. Kutani ndzi yile ehansi lahaya. Nakona votala va n'wina a mi ri kona. Ndzi ku, "Xana munhu a nga swi vula ha yini swilo swo tani hi sweswo, loko Rito . . ." Sweswi, wa vona, a ndzi kalanga ndzi ku ndzi muprefeta; hi yena a nga swi vula.

²⁵⁰ Nakona muprefeta, rito *muprefeta*, "muvonisisi," Testamente ya Kha- . . . Sweswi, mavekele ya Xinghezi ya rito *muprefeta* ya vula "muchumayeri." Kambe *muvonisisi* wa Testamente ya Khale a kuri wanuna loyi a ri na "nhlamuselo ya Rito ra Matimba," nakona a khorwisiwa hi Rito leri a ri ta eka yena na ku ri vhumbha. Sweswo a kuri leswi . . .

²⁵¹ Kutani wanuna loyi a vulaka leswaku munhu a ngava muprefeta, kutani a vula leswaku Dyondzo ya yena yi hoxekile? Loko sweswo ku ngari makungu yo tirha mali, xana i yini? Awara yi le kusuhi laha nchumu walowo wu nga ta hlumuriwa eka mbono. Ina. Kambe walowo i muxaka lowu, mupfumeri luya wo tiendlisa, u ku bambatela enhlaneni, a ku vula "boti," ntseña ku kotisa Yudas. Kambe, tsundzukani, A swi tiva ku sukelia eku sunguleni. Wa ha swi tiva. Ina, nkulukumba.

²⁵² Tsundzukani, hinkwawo lava nga yingisela thepi leyi, na vonavu, hi swona sweswo, mi le ka yin'wana ya mintlawa leyi. Sweswo hi swona ngopfu. Sweswi hi ya eku pfaleni. Munhu un'wana na un'wana loyi a nga lahawani, a nga kona, munhu un'wana na un'wana loyi a yingisaka thepi leyi; hambi leswi siku rin'wana ndzi nga ta fanelia ku hundza emisaveni, tithepi leti ta ha ta hanya. Hi swona sweswo. Wa vona? Nakona mi le ka yin'wana ya mintlawa leyi. Mi fanele kuva eka wun'wana wa yona. Swi tano. Mi ngaka mi nga swi balekeli. Mi le ka wun'wana wa mintlawa leyi.

²⁵³ Sweswi i yini? Tixakahateni na ximunhuhatwa xa Bibelexi a xi pfumela, laha mi nga pfumela Rito loko Ri tiyisisiwa, tani hilaha ndzi nga Ri khorwisa hakona vusiku lebyi, leswaku a ri ri Rito leri nga tiyisisiwa nkarhi hinkwawo, nkarhi hinkwawo ku hambana na ku pfumela loku ku nga tolloveleka.

²⁵⁴ Loko kuri ku a mi fanele kuva mi hanyile hi masiku ya Nowa, sweswi mi nge ndzi tivutisa, xana i tlhelohi leri a mi tava mi ri eka rona, tlhelohi ra kereke kumbe tlhelohi ra Nowa, muprofetake? Wa vona?

²⁵⁵ Loko a mi lo hanya hi masiku ya Muxe, xana a mi tava mi ri pfumerile hungu ra Muxe endzhaku ka loko Ri tava ri khorwisiwile na ku tiyisisiwa hi Xikwembu? Kambe xana a mi tava mi yile na Korah na Dathan, na lavan'wana, kutani mi ku, "A hi wena u ri wexe u nga mukwetsimi. Vanhu van'wana va nga swi endla swilo leswi u swi endlaka, na vonavu"? Wa vona? A mi ta boheka kuva un'we eka vona, nakona mi yena, vusiku lebyi.

²⁵⁶ Kumbe xana a mi tava mi vile na Daniel, kumbe na kereke leyia yi ri le hansi enkhubyeni wa Nebukadnetzar lowu a vari na wona-ke? Wa vona? Xana a mi tava mi ri ehandle, kumbe xana a mi tava mi ri le hansi entlangwini, e-e nchumu wukulu lowu a vari na wona?

²⁵⁷ Xana a mi tava mi vile na Eliya, wanuna luya a yimile a ri yexe, a vuriwa, "mukhalabya wo ka a nga tollovelekanga, wanuna loyi a lahlekeriweke hi miehleketo," na kuva a yimile ehenhla ka xiganga, na nhloko yakwe yi ri karhi yi vangamisiwa hi dyambu kwalahaya, a khomile nhonga yo gombonyoka evokwemi ra yena, swinyenyana swi ri karhi swi n'wi phamela, ahaa, munhu un'wana wo ka a nga tollovelekanga? Kumbe xana a mi tava mi ri na vaprista na hinkwavo ka vona le hansi na Yezabel, na hinkwavo vavasati va lava ambaleke swa ximanguva lawa-ke? Kutani Eliya a yimile kwalahaya, a ri karhi a va tshinya, hilaha a kota hakona! Xana i xiphemu xihi lexi a mi ta yisa nsati wa n'wina kona? Ntsena ehleketa. Tifaniseni vusiku lebyi.

²⁵⁸ Hi masiku ya Yesu, xana a mi tava mi ri na Jaha leri nga riki na swilaveko-ke? A ngari na vuxaka na dinominexini. Va te, "Xana U huma eka xikolo xihi? A hi na Wena eka rhekhodo ya hina lahwani. Xana U byi kuma njhani vutlharhi lebyi? Xana U dyondzise ku yini loko hina hi nga Ku dyondzisanga swilo leswi? Xana U huma eka xikolo xihi? Xana U Mumethodist, Mupresbyterian, kumbe Mubaptist-ke?" A ngari swona hinkwaswo. [Boti un'wana a ku, "A ri na Rito."—Muhleri.] Hi swona sweswo. A ri Rito. Sweswo hi swona ngopfu, boti. Xana wena...

²⁵⁹ Kumbe xana a mi tava mi tekile tlhelohi ra Vafarisi va ku pfumela ka ximanguva lawa ka muprista wa mukhalabya wo titsongahata loyi a languteka a ri na malwandla na kuva kahle, na vandla leri nga yima ku sukela eNicaea Council, kumbe ku sukela loko Luther a ri kondleterile-ke? Kumbe xana—xana i ntlawi wihi lowu a mi tava mi ri eka wona? Xana a mi tava mi ri eka... Xana i ntlawi wihi lowu a mi tava mi ri na wona? Xana a mi tava mi yimile na Rito loko mi Ri vonile ri tiyisisiwa na kuva ri khorwisiwile eka n'wina, leswaku a Ri ri Hungu ra siku

lero, kumbe xana a mi tava mi tekile tlhelo ra kereke-ke? Sweswi tifaniseni vusiku lebyi.

²⁶⁰ Xana a mi tava mi ri kwalahaya na vaapostola, loko va vona Yesu na swilo hinkwaswo leswo hlamarisa, loko A ta gandlavetela vachumayeri lavaya, kutani a ku, “Mi xisaka xa tinyoka”? Lavo tshembheka, vachumayeri va khale va hlayile Rito lero. A ku, “A mi nchumu handle ka bakwa ra makhamba, nakona mi—mi tele hi marhambu ya vafi. A mi nchumu handle ka khumbhi ro basa.” Wa vona? “N’wina rixaka ra timhiri.” Xana a mi tava mi yimile na Nakulorhi wa xipandza-nhloko xo tani hi xexo, Loyi a nga yima kwalahaya kutani a tshinya na ku handzulela-ke? U te, “I mani exikarhi ka n’wina a nga Ndzi hehlaka hi xidyoho? Loko Ndzi nga endli leswi Tatana a nga vula . . .”

²⁶¹ Va te, “Mi nga yingisi. Nakulorhi luya u na moya wo biha eka Yena. U hlanganile nhloko. Wa penga. U na—U na moya wa javuloso endzeni ka Yena. Wa vona? Sweswi, e . . . hilaha A endlaka sweswo, Yena, i moya wa muvhumbhi lowu nga endzeni ka Yena. Mi vula ku, hi Yena mani? Mana wa yena u N’wi kumile loko yena na nuna wakwe va nga se tekana. Wa vona? Wa vona? Xana U huma eka xikolo xihi? Hi hava na rhekhodi na yin’we ya kuva A tshame a ya eka xikolo xa vuvulavuri.”

²⁶² Hambi swi ri tano loko A ri na khume mbirhi wa malembe hi vukhale, U hlamarisile na ku pfilunganya vaprista, hi Rito ra Xikwembu. Wa vona? Xana U huma eka xikolo xihi? Xikolo xa le Henhla. Wa vona? “Loko mi vona N’wana wa munhu a xikela ehenhla laha A humaka kona.” Wa vona, xexo hi xona xikolo xa Yena.

²⁶³ Kambe xana a mi tava mi yimile na vaapostola, eka Wanuna wo kota yaloye, loko mphikizano wu ta?

²⁶⁴ Kumbe xana a mi tava mi fambile na lava va makume kombo, kutani mi ku, “Kunene, hi ta tlhelela ekerekeni ya hina loko kuri ku yaleyo hi yona ndlela leyi U nga ta dyondzisa hakona, ku vula leswaku, Wena, ‘u N’wana wa munhu?’ Loko, endzhaku ka hinkwaswo, hi Wena mani? Xana U yini? Wanuna wo kotisa mina, ndzi dya na Wena, nakona u ringeta ku vula leswaku U swin’wana. Ndzi Ku langutisile. Ndzi vonile ku tsana ka Wena. Ndzi Ku vonile u rila. Ndzi Ku vonile u endla *leswi*, *sweswo*, kumbe *leswin’wana*. Ndzi Ku vonile u ya emananga na hina, na hinkwaswo swo kota sweswo sweswi, nakona Wo va munhu ntsena. Kutani U ri u ta u huma hi le Tilweni. Sweswo swa tika eka mina.” Xana a mi tava mi fambile na vona-ke? Kumbe a mi tava mi fambile na lava va makume nkombo-ke? Kumbe a mi tava mi fambile na vaapostola na Kreste-ke?

²⁶⁵ Loko Mukwetsimi Martin a tava a ringetile ku khoma nkhuvulo hi Vito ra Yesu Kreste, ekerekeni, loko a tava a ha ringetile ku khomelela eka masingita na swihlamariso na

swin'wana, kutani kereke ya Khatholiki yi sorile wanuna na kona a yi n'wi tekelanga enhlokweni na swintsongo, kutani yi N'wi hlongola, xana a mi tava mi tekile ndhawu ya mukhuva wa Xikhatholiki, kumbe a mi tava mi yimile na Mukwetsimi Martini-ke? Loko a tava a arile ku hayeka tinxaka leti hinkwato ta swifaniso swa—swa vanhu vo fa, na ku swi gandzela, ku gandzela swifaniso leswi, na swin'wana, loko a tava a arile tidyondzo leti a ti cheriwile, a ku, "A kuve Rito ri nga ra Ntiyiso!" Kutani Xikwembu xi n'wi tiyisisile hi masingita lamakulu na swihlamariso, nakona leswi a swi vhumbha a swi humelela. Kutani hinkwaswo leswi a swi endla, a famba hi Moya wa Xikwembu nakona u swi khorwisile, nakona a kuri hava na un'we wa vaprista loyi a ta endla nchumu hi swona. Xana a mi tava mi tekile tlhelo ra yena kutani mi famba na Mukwetsimi Martin, kumbe xana a mi tava mi fambile na mukhuva wa Xikhatholiki-ke?

²⁶⁶ Sweswi Rito, sweswi Rito ra Xikwembu kumbe dyondzo ya kereke, swi le mahlweni ka n'wina. Xana mi nga teka, mi amukela dyondzo ya kereke, kumbe mi teka leswi Rito ri swi vulaka-ke?

²⁶⁷ Tsundzukani, eka tinguva hinkwato swi vile hi ndlela leyi swi nga xiswona sweswi. Ku tshama kuri na ku pfumela loku nga tololeleka exikarhi ka vanhu, nakona nkarhi hinkwawo ku vile loku ku hambanaka swintsongo na Rito ra xiviri. Tsundzukani, a ku se tshama kuva ku Ri kaneta erivaleni. Oho, ee. Antikreste a nga ali Rito. Kunene a swi tano. U vula leswaku wa Ri pfumela, kambe ku ngari hinkwaro ka Rona hi ndlela leyi Ri nga tsariwa hakona lahawani. Wa vona? Wa vona?

²⁶⁸ Sathana u byerile Evha. Evha u Ri pfumerile hinkwaro handle ka swintsongo leswi a nga n'wi byela swona. Va Ri teka hinkwaro handle ka swintsongo nyana. Ku ngava, "kuya exidziveni," ku ngava kuri swin'wanyana. Mi fanele ku Ri teka, xiphemu xin'wana na xin'wana, ntsena hi ndlela leyi Ri nga xiswona *Lahawani*, wa vona, ntsena hi ndlela leyi Ri nga vuriwa hakona *Lahawani*. Swi nga endla leswaku mi endla mintirho yin'wana yo sungula nakambe, kambe hi leswi ntsena kova leswi Rito ri nga swi vula. Lawa ya vile mano ya Sathana ku sukela loko a tava a ya tirhisile eka Evha, ntsena ku ala xiphemu xintsonga xa Rito.

²⁶⁹ Nakona, nkarhi hinkwawo ri hambanyisa mintlawa leyi yi nharhu ya vanhu, Rito ri hambanyisa vanhu lava. Eka nguva yin'wana na yin'wana a swi ri hi ndlela ya leyo. Eka nguva yin'wana na yin'wana leyi nga tshama yi va kona, swi vile hi ndlela yaleyo, loko Xikwembu xi rhumela nchumu wo karhi eka mbono na ku Wu tivisa erivaleni, kuva wuri Rito ra Xona.

²⁷⁰ Kutani kuna lavaya va landzelaka, lava va koxaka kuva vari vapfumeri, nakona hi vona. Kuna lava va nga taka va nga tlheleli

endzhaku. Va pfumela Rito. Ntsena loko u tshama eRitweni, va Ri pfumela.

²⁷¹ Kambe loko Ri fika laha ri hambanaka swintsongo, swi ngari na mhaka leswaku Xikwembu xi Ri tivisisa ku yina eka leswi va swi pfumelaka, va ri, “Kunene, a ndzi—ndzi—ndzi swi tivi hi mayelana na *Sweswo*.” Yaloye hi loyi a nga pfumeriki.

²⁷² Kumbe xana ma landzelela ntsena kuva mi vona ku kondza mi kuma nkateko wa kuva mi ku, “Ahaa, hi leswi!” Yudas wo tlhava un’wana enhlaneni, tani hilaha a nga swi endlisa xiswona. “A ndzi swi tiva leswaku swi ta humela erivaleni, ku ngari khale kumbe endzhaku ka nkarhi. Hi *sweswo!*” Yaloye i mupfumeri wo tiendlisa. Xin’wana na xin’wana, xiphemu xin’wana na xin’wana xa swona, hi xi vona eBibeleni.

²⁷³ Xifanyetana xin’wana nkarhi wun’wana, kona kwala eKentucky, lexi nga kulela le henhla etintshaveni, a xi—xi nga se tshama xi va laha a kuri na nghilazi yo tivona hi yona. A vari na xiphemu nyana lexi a xi beleriwe ensinyeni, kambe a xi nga se tshama xi tivona xona hi xoxe. Xi tile laha eLouisville, xi byeriwile, kutani xi tshama na sesi wa mhani wa xona. Kutani yena a tshama eka yin’wana ya miti ya kahle, muti wa xikhale. Loko va yile eka yin’wana ya—ya tikamara to etlela leyi a yi ri na—na rivanti leri a ri ri na xivoni ku fika ehenhla ka rona, hinkwako kuya ehenhla na le hansi ka rivanti. Wa vona?

²⁷⁴ Kute loko nakulorhi lontsongo a tava a sungurile ku tsutsuma hi yindlu, u yimile. Johnny lontsongo u vonile Johnny lontsongo. Wa vona? Hi loko a ti tshuva nhloko ya yena, na Johnny lontsongo exivonini a titshuva nhloko ya yena. A hlekta, na Johnny lontsongo exivonini a hlekta. A tlulela ehenhla na le hansi, ivi Johnny lontsongo a tlulela ehenhla na le hansi exivonini. Wa vona? A tshinela ekusuhi swinene. A ehleketa leswaku i xifanyetana lexi a nga tlangaka na xona, kutani a ya kwalahaya. Hi ku kongoma, a gembra nghilazi. U hundzulukile, nakona vatsvari va yena a va n’wi langutile. A ku, “Mhani, hi mina luya.”

²⁷⁵ Sweswi n’wina langutisani eka *Leswi*, kutani hi xih mi nga xona? Ahaa. Ahaa. Hi xih mi eka Vajohnny *leswi* swintsongo mi nga eku xi encenyeten? Hi xih mi lexi mi nga xona, ma swi vona? Mi xin’wana xa swona.

²⁷⁶ Yaloye hi un’wana wa vona, loyi a nga ta tlhentlha, xihoxo xo sungula lexi mi xi kumaka, lexi mi xi vulaka xihoxo. Wa vona?

²⁷⁷ Xi ringeni hi Rito ivi mi vona loko xi lulamile, loko Rito ri ringa swilo hinkwaswo. Wa vona, ringani swilo hinkwaswo hi Rito. Yesu u te mi endla tano. Ina, nkulukumba. “Khomelelani eka leswi swi nga kahle.” Sweswo hi leswi A nga swi vula.

²⁷⁸ Sweswi langutisani eka xivoni xa Rito ra Xikwembu, eka tinguva letin’wana, kutani mi vona leswaku i ntawha wihi eka lava vanharhu lowu mi nga xakahatiwaka eka wona. Sweswi

ehleketani, loko a mi tava mi hanyile hi masiku ya Nowa, loko a mi tava mi hanyile hi masiku ya Muxé, loko a mi tava mi hanyile hi masiku ya Yesu, kumbe un'wana wa wona, hambi ku ngava mani ntsena ehleketani leswaku i ntława wihi lowu a mi ta xakahatiwa na wona. Ehleketani hi swona vusiku lebyi.

²⁷⁹ Kutani, nkarhi wa n'wina wa sweswi. Sweswi, ntsena ehleketani sweswi. Leswi swi entile sweswi. Nakona mi nga tsutsumi hi le henhla ka swona. Xiyimo xa nkarhi wa n'wina wa swi khorwisa eka n'wina leswaku i ntława wihi lowu a mi tava mi ri na wona le ndzhaku. Sweswi, mi vaavanyisi va n'wina hi n'wexe, swi khorwisa leswi mi nga xiswona.

²⁸⁰ Mufundhisi, ministara, i ntława wihi lowu a wu tava u ri na wona loko Yesu a virile mhaka liya a yi nonohwa ku yi pfumela? Hi wihi? Hi wihi? Endzhaku ka loko A tava a tiyisisiwile hi ku hetiseka leswaku A ri Rito, wa wona, nakona hambi swi ri tano, mhaka liya, a mi se tshama mi twa hi ta nchumu wo tani hi walowo, "N'wana wa munhu, xana mi to yini loko A tlhandlukela ehenhla eTilweni laha A humaka kona?"

²⁸¹ Kutani mi te, "Kunene, ndza ku tiva laha A nga tswariwa kona. Ndza n'wi tiva papa wa Yena, ndza n'wi tiva mana wa Yena, kutani hi Loyi a nge U ta tlhandlukela ehenhla laha A humaka kona." Sweswo a swi tava swi tika nyana eka n'wina, a hi swona, nkulukumba? Ahaa. A swi tava swi tikile nyana eka n'wina; a mi tava mi nga swi tiyelanga Sweswo. Kumbexana i nchumu lowu fanaka na namuntla. Kutani langutisani enghilazini ya Rito ra Xikwembu kutani mi wona laha mi yimaka kona. Oho, muhambukisi wa vanhu, u nga tshuki u swi endla sweswo.

²⁸² Langutisani, mi le ka yin'wana ya mintława leyi. Eka xiyimo xa n'wina xa nkarhi wa sweswi, xiyimo xa nkarhi wa sweswi xa miehleketo, lexi, n'wina lava mi nga kona eka vayingiseri lava vonakaka, na n'wina mi nga tava eka vayingiseri lava nga vonakiki va thepi leyi, xiyimo xa nkarhi wa sweswi xa miehleketo ya n'wina endzhaku ka ku yingisela thepi leyi, xi khorwisela leswaku i ntława wihi lowu mi nga eka wona. Xi mi byela hi ku hetiseka laha mi nga kona, hambi mi mupfumeri eRitweni nakona mi ta tshama na Rona, hambi mi ta huma mi famba, kumbe mi ta tima thepi yaleyo. Hmm? Sweswo swi vula leswi mi nga swi endla. A mi lavi ku Ri yingisa, kutani mi Ri tima, mi ku, "A ndzi lavi ku yingisela Sweswo," yaloye, yaloye hi loyi a nga pfumeriki. Wa wona, mi ngaka mi nga yimi ku swi ringa mi ta wona loko kuri ku i Ntiyiso kumbe ee. Wa wona? Kumbe ntsena ku tshamelela kwalahaya na ku ringeta ku kuma xihoxo xo karhi eka Rona, kutani mi tiva laha mi nga kona, na n'winavu. Swa mi byela.

²⁸³ Xikwembu hi pfune ku Ri pfumela na ku yima ehenhla ka Rona, na ku tshembheka eka Rona, na ku yingisa Rito, hikuva hi

Yena Rito. Xana ma swi pfumela sweswo? [Nhlengeletano yi ku, "Amen."—Muhleri.]

A hi, a hi khongeleni.

²⁸⁴ Tatana wa le Matilweni loyi a rhandzekaka, hilaha swi tikaka hakona, nkarhi wun'wana, ku vula swilo leswi, na ku tiva leswaku kumbexana khume ra magidi ra vanhu va ta swi twa leswi eka thepi, tani hi loko ti ri karhi ti ya ehandle ku tsemakanya tiko na ku rhendzeleka hi misava. Kambe, Hosi leyi Rhandzekaka, i ntiyiso, i ntiyiso ngopfu. Ndza khongela, Hosi, sungula u basisa mbilu ya mina. O Hosi, ndzi ringe, ndzi ringeti.

²⁸⁵ Ntsena langutisa ehansi eka mina, Hosi. Ndzi tsanile. Ndzi—ndzi—ndzi... Ndzi—ndzi karhele. Ndzi—ndzi hlakarile. Nkolo wa mina wa khwaxa. Milomo ya mina—mina—mina ya—ya—ya—ya omelela, ku kotisa sweswo. Kutani, kutani miri wa mina wu le ku hlakaleni, ndzi le ku khalabyeni. Nakona—nakona a ku ngavi minkarhi yotala ngopfu, Hosi, kumbexana, ku rhendzeleka kotala ngopfu ka dyambu, ku kondza—ku kondza ndzi—ndzi famba.

²⁸⁶ Kutani sweswi ndzi kambisisi, sweswi, Tatana. Nakona loko—loko kuri na swin'wana leswi ndzi swi endlaka leswi nga hoxeka, nakona ndzi nga swi tivi, ntsena U—U ndzi paluxela swona, Hosi. U, U ndzi komba. Ndzi, ndzi lunghekile sweswi ku swi lulamisa.

²⁸⁷ Ndzi tilangutisa lahaya enghilazini ya Rito ra Xikwembu. Xana ndzi yima kwihi? Xana ndzi vona xifaniso xa mina xi vonakarisa Yesu Kreste-ke? Xana hi yena munhu loyi ndzi n'wi vonaka enghilazini-ke? Xana ndzi vona un'wana wa vapfumeri va Testamente ya Khale, kumbe vapfumeri va Testamente Leyintshwa-ke? Xana ndzi vona mupfumeri wo tiendlisa? Xana ndzi tivona tani hi loyi a nga pfumeriki loyi a nga ta yima a yingisa Rito, kutani a teka mianakanyo ya dinominexini-ke? Xana ndzi tivona ndzi ri karhi ndzi tshamelela, ku ringeta ku kuma mbhovo?

²⁸⁸ Hosi, loko swi ri tano, ntsena—ntsena ndzi basise, Hosi. Pfumelela mbilu ya mina yi va leyi nga basa na ku teng. Hikuva, lebyi i vutomi bya mina, Hosi, ndzi... Byi, ndzi lava byi lulama. A swi pfuni nchumu ku swi endla hi ku tsemakanya, loko kuri na ndlela yo swi endla hi xiviri. Ndzi, ndzi lava leswaku byi lulamisiwa kahle, Tatana. Ku ngari sweswo ntsena, kambe ndzi tava ndzi ri karhi ndzi fambisa vavanuna hi ku hoxisa, na vavasati hi ku hoxisa, na vanhu lava ndzi va rhandzaka, na vona va ndzi rhandza; kutani, ndzi tava ndzi hoxisa.

²⁸⁹ Kutani, Tatana, loko kuri na swin'wana na swin'wana, loko kuri ku a ndzi ehleketa leswaku kereke yin'wana na yin'wana ya dinominexini yi lulamile; kumbe Huvo ya Tikereke yi lulamile, loko kuri ku vunyingi bya vanhu a byi lulamile; Hosi Xikwembu, ndzi pfune kuva wanuna ku ringana, na Mukreste ku ringana,

ku va ndzi pfumela ku hoxa ka mina kutani ndzi yima lahawani ndzi rhumela vanhu lava laha ndzi ehleketa ka leswaku ku tava ku lulamile. Ndzi basise. Ndzi pfumeleli ndzi langutisa kutani ndzi vona. Kambe loko swi fika eka swilo leswiya, Hosi, kuya hilaha ndzi nga vonaka hakona, kuva na tinghohe letiya na ku ala Rito; u nga va byela Swona, kambe hambi swi ri tano va ku, "Kunene, a Swi endli ku hambana. A swi... Xikwembu a xi langutelanga Sweswo sweswi."

²⁹⁰ Hosi, ndza pfumela leswaku Wa hari Yesu loyi a fanaka. Wa hari Xikwembu lexi fanaka lexi a Wu ri xona nkarhi hinkwawo. Wa hari Xikwembu, nakona a Wu cinci. Ndzi pfumela leswaku Bibeleyi i Rito ra Wena, na swona ndzi pfumela leswaku Wena na Rito ra Wena ma fana.

²⁹¹ Kutani ndza khongela, Xikwembu, leswaku U ta hi nyika Moya wa Wena lowo Kwetsima, ku hanyisa Rito, ku hi nyika Matimba yo hanyisa; leswaku, siku rin'wana loko vutomi byi herile, nakona loko U hetile hi hina, leswaku hi ta hanyisiwa na ku tlhandlukela eTilweni laha a hi ri kona, emiehlekete weni ya Xikwembu, ku nga seva na masungulo ya misava. Xikwembu, hi nyike swona.

²⁹² Hi rivaleli swidyoho swa hina, Tatana. Loko kuri na vavanuna kumbe vavasati lahawani, lava va yimaka eka ntlawu lowun'wana, ehandle ka vapfumeri va ntiyiso va Rito, Xikwembu, basisa timbilu ta vona. Loko kuri na un'wana loyi a nga yingisela eka thepi, kumbe loyi a nga ta yingisela, ndzi khongeleta ku basisiwa ka timbilu ta vona, leswaku U ta va basisa, Hosi. A ndzi—ndzi swi lavi ku vona va lahlekile. Xikwembu, ndza khongela leswaku U ta—U ta hi pfunu ku twisia leswaku xihoxo xin'we xi ngaka—xi ngaka xi nga lulamisi xihoxo xin'wana. Kuna ndlela yin'we ntsena yo swi endla, leyi nga ku susa swihoxo ha vumbirhi endleleni, kutani ku lulamisiwa. Kutani ndza khongela, Tatana, leswaku U ta hi nyika, ha Yesu Kreste Hosi ya hina.

²⁹³ Loko ha ha korhamisile tinhloko ta hina, hi korhamisile timbilu ta hina, sweswi ndzi lava leswaku mi yima nyana xinkadyana.

²⁹⁴ Loko ndzi ta vona xivono xa tihele, tani hi—tani hi xifanyetana, ku chavisa ka tona. Kutani, ndzi ngava ndzi hoxisa eka leswi. Sweswo swi ngava swi vile ku ehleketelela. Swi ngava tano. A ndzi swi tivi. Swi tikomba ingaku a ndzi ri kun'wana. A swi ri swa ntumbuluko swonghasi.

Kutani, ku ngari khale ngopfu, loko ndzi ta vona xivandla xa vakwetsimi.

²⁹⁵ Loko ndzi ri exivandleni xa lava lahlekeke, ndzi kalakarile, "O Xikwembu, u nga tshuki u pfumelela munhu kuva a ta lahawani!" U nge swi koti, ku hava ririmu leri ri nga mi hlamuselaka leswi ku chavisa ka tona ku nga xiswona. Ku hava

ndlela yo va mina ndzi mi byela. Loko mi pfumela leswaku kuna tihelle leti pfurhaka, leti nga tala hi ndzilo na xivavula, sweswo a swi tava e—e madyelo ya rihlaza yo hola na kuva na ndzhuti eka mbono wa leswi ku chavisa ka xiyimo lexi xo lahlek a kuri xiswona, na maxangu lawa ya—lawa ya fananisiwaka na ndhawu liya.

²⁹⁶ Kutani loko a ndzi ringetile ku vulavula na n'wina hi swilo leswi nga vaka ekule na matwisisile ya munhu, a ndza ha tava ndzi nga se hlamusela xivandla xa vakwetsimi, hilaha xi nga rhula hakona! A ka ha fiwi, a ka ha dyuhariwi, a ka ha vabyawi; ku tshamiwa kuri evuntshweni, ku tshamiwa ku hanyiwile kahle, nakona a ka ha fiwi; Vutomi lebyi nga Heriki, evutshweni bya vukwetsimi, nakona ku hava xidyoho kumbe swin'wana! Oho, ku hava ndlela yo kom—... hlamusela, yo swi hlamusela.

²⁹⁷ Hambi kuri Mukwetsimi Paul, u te, "Tihlo a ri vonanga, ndleve a yi twanga, nakona a swi kalanga swi nghena etimbilwini ta vanhu," mi ngaka mi nga swi twisisi; ku hava ndlela yo swi hlamusela, "leswi Xikwembu xi nga va lulamisela swona, swi va yimeleke, lava va Xi rhandzaka."

²⁹⁸ Kutani sweswi, tani hi leswi hakunene leswi swi nga ntuyiso, ha vumbirhi laha na le ka vayingiseri lava nga vonakiki, hi fanisiwile lahawani, vusiku lebyi, eka yin'wana ya mintlawa ley. Hi nga hava hi ri vapfumeri va xiviri... Swi ringeni hi Rito. Loko Rito ri vule nchumu wo karhi, kutani kereke yi vula nchumu wun'wana wo hambana, xana mi nga teka yini? Langutisani eka nghilazi ya Rito ra Xikwembu kutani mi vona leswaku i ntlawa wihi lowu mi nga yima eka wona. Kutani loko mi nga ri kona, vusiku lebyi, ha vumbirhi lahawani na le ka vayingiseri lava nga vonakiki, loko mi nga ri kona, loko mi nga ri na xifaniso lexi pfumelaka, xana ndzi nga mi endlela rito nyana ra xikhongelo sweswi, leswaku mi ta ta eka xifaniso lexiya xi pfumelaka?

²⁹⁹ Nakona xana mi nga twarisa leswi fanaka, hi Xikwembu; loko ma ha korhamisile tinhloko ta n'wina, mi korhamisile timbilu ta n'wina, mi pfarile matihlo ya n'wina, nakuva emahlweni ka Xikwembu? Nkarhi wun'wana vanhu va va na ku chava nyana, ma swi tiva, ku yimisela mavoko ya vona ehenhla, va chava leswaku makhelwani wa vona... Leswi, a va nga fanelanga kuva hi ndlela yaleyo, kambe a va—va fanele ku tshama va yimile, kutani va ku, "Mina, ndzi hoxile. Ndzi hoxile."

³⁰⁰ "Loyi a—loyi a fihlaka swidyoho swa yena a ngaka a nga kateki, kambe loyi a tivilaka swidyoho swa yena u ta kuma tintswalo." Wa vona? Xana xidyoho i yini? "Ku kala ripfumelo," ku kala ripfumelo eka (yini?) Rito.

³⁰¹ Sweswi, loko mi ngari kona eka ntlawa walowo, nakona kuri na swilo leswi—leswi mi swi vonaka eBibeleni leswi hi ku olova mi... hi—hi bya n'wina... hi—hi vutharhi bya n'wina—

bya n'wina, mi—mi nga swi voniki. Ntsena ma... Ma swi tiva leswaku Bibele yi vula tano, kambe ntsena mi... Leswi mi nga swi twisisiki, nakona hambi swi ri tano ma swi lava. Mi nge, "Xikwembu, ndzi nyike ku twisisa. Ndzi ta Ku yingisa."

³⁰² Xana mi nga yimisa mavoko ya n'wina, kutani mi ku, "Ndzi tsundzuki loko hi ri karhi hi khongela"? Xikwembu xi ku katekisa. Xikwembu xi ku katekisa. Sweswo swi kahle. Wa vona?

³⁰³ Kunene ehleketa hi swona, "Xana ku ngava kuri na swin'wana eBibeleni leswi ndzi—ndzi ntsena ndzi—ntsena ndzi nga swi tiviki? Ndzi—ndzi—ndzi—ndzi chava leswaku ndzi nga tikuma ndzi ri eka xin'wana xa swiyenge leswin'wana. Kumbexana ndzi ya eku tikumeni ndzi ri na lava va makume nkombo, leswi ndzi... Kova na swilo leswi ndzi... Swi ndzi tikele swinene kuva ndzi twisisa hilaha Xikwembu xexo—xexo xi nga endlaka swilo leswi, hilaha Xi nga vaka hakona, hilaha Yesu a nga vaka loyi a fanaka, hilaha—hilaha swilo leswi. A ndzi—a ndzi Swi twisisi. Ndzi lava ku Swi twisisa. Ndzi—ndzi lava ku Swi pfumela. Na swona, Xikwembu, susa ku kala ripfumelo ka mina. Ndzi—ndzi lava kuva xiphemu xa Swona. Ndzi lava kuva mudyandzhaka wa Rito. Ndzi Ri lava endzeni ka mina."

³⁰⁴ "Loko mi tshama ka Mina, na Marito ya Mina ya tshama ka n'wina, kutani kombelani hinkwaswo leswi mi swi rhandzaka." Mukwetsimi Yohana 15. Ha swi tiva leswaku walowo i ntiiyiso. Langutisani, "Loko mi tshama," ku ngari endzeni nale handle, endzeni na le handle, kambe, "loko mi tshama eka Mina," nakona hi Yena Rito, "na Rona ri tshama eka n'wina, kutani kombelani hinkwaswo leswi mi swi rhandzaka nakona mi ta endleriwa swona. Mi ta swi kuma."

³⁰⁵ "Loyi a yingisaka Rito ra Mina, a va a pfumela eka Loyi a Ndzi rhumeke, u hundzile ekufeni kuya eVuton'wini." Kambe xana mi nga amukela Rito, ku sungula-ke? Xana mi nga ri amukela Rito, Rito hinkwaro, Kreste a helerile? Kreste i Rito leri totiweke. Hi yena Rito, leri nga totiwa.

³⁰⁶ *Kreste* swi vula "Mutotiwa," Rito leri totiweke ra siku lero, leri nga vonakarisiwa, Muponisi, Mukutsuri. Sweswo hi loko A ta vuya, nakona A ri Munhu loyi a totiweke loyi a fanele ku teka ndhawu yaleyo.

³⁰⁷ Sweswi i Moya lowo Kwetsima emasikwini ya makumu, ku voningela Mavoni ya ni madyambu emahlweni, ku tlherisela Ripfumelo endzhaku [Xivati lexi nga riki na nchumu eka thepi—Muhleri.] leri nga kandziyeriwa ehansi, hi tidinominexini; ku avanyisa tidinominexini na ku tlhelela eka Ripfumelo ra xiviri, hi Ripfumelo ra xiviri ra Bibele; Bibele ya xiviri, ku pfumela Rito rin'wana na rin'wana ra Yona, ku ngari ku yi engetelela na ku endla leswaku Yi vula *leswi* na ku vula *sweswo*. Ntsena ku Ri

vula hi ndlela leyi Ri nga vurisiwa xiswona, nakona mi lava ku swi pfumela hi ndlela yaleyo.

³⁰⁸ Xana a ngava a ri kona loyi a nga se tshamaka a yimisa voko ra yena, loyi a nga tsakelaka ku yimisa voko ra yena, kutani a ku, "Xikwembu, ndzi tsundzuke"?

³⁰⁹ Xikwembu xi ku katekisa, manana. Xikwembu xi ku katekisa, nhwana. Xikwembu xi ku katekisa, wena. Swi kahle. Xikwembu xi ku katekisa, nakulorhi lontsongo. Xikwembu xi ku katekisa, sesi wa mina. "Ndza N'wi lava. Ndza..." Xikwembu xi ku katekisa, sesi, lahaya exineneni xa mina. Na wena u kateka, le ndzhaku. "Ndzi lava..." Na wena Xikwembu xi ku katekisa, jaha. Na wena, sesi, kwalano. Wena, boti, eka tlheloh erin'wana, Hosi yi ku katekisa. Xikwembu xi ku katekisa, le ndzhaku. "Ntsena ndzi tsundzuki, Hosi."

³¹⁰ Sweswi tsundzukani, a mi yimiselanga voko ra n'wina eka mina; eka Yena. Kona kwale ndzhaku ka mina, sweswi, Hosi ya ri vona voko ra wena. Hambi loko ndzi ri hupile, Ya ri vona. Yi tiva mbilu ya wena. Ya swi tiva leswi nga eku beni kwalahaya. Yi tiva xikongomelo xa wena. Ya swi tiva leswaku nsusumeto wa wena i yini eka xikongomelo xexo. Xikwembu xi ku katekisa, boti.

³¹¹ Munhu un'wanyana, "Ndzi lava ku pfumela Rito hinkwaro." Xikwembu xi ku katekisa. Swi lulamile. Xikwembu xi ku katekisa. "Ndzi pfune, Hosi, ndzi pfune." Hosi ya ma vona mavoko ya n'wina. Ina, nkulukumba. Hi swona sweswo. "Kuna swilo leswi ndzi—ndzi nga swi twisisiki. A ndzi—ndzi lavi kuva loyi a nga pfumeriki. Hambi leswi ndzi nga swi twisisiki, ndzi lava ku swi pfumela, hambi swi ri tano. Ndzi lunghekile ku vula leswaku, 'Hosi Xikwembu, hi mina loyi. Ndzi lava ku pfumela. Susa ku kala ripfumela ka mina, Hosi.'" Xikwembu a xive na wena. Xikwembu xi ku katekisa. Yo tala, mavoko yo tala ya yimile, nakona ya ha ya emahlweni ya yima.

³¹² Mi ri, "Makwerhu Branham, xana sweswo swa pfuna?" Yimisa voko ra wena kan'we, hi xa xiviri, xikongomelo xo lulama, kutani u kumisisa leswaku u titwa njhani hi mayelana na swona.

³¹³ U nyikile vumbhoni leswaku kuna swin'wana nyana evuton'wini bya wena, wa swi tiva. Kuna swin'wana nyana, a wu swi lavi kuva swi va kona, kambe swi kona, hambi swi ri tano. Wa tivutisa hilaha swi nga endliwaka hakona. "Kutani, Hosi, u nga swi pfumeleli leswaku ndzi va Yudas. U nga swi pfumeleli kuva ndzi landzelela eka—eka Hungu, ntsena kumbexana hi ku ringeta ku ehleketa leswaku siku rin'wana ku tava na xihoxo nyana lexi xi nga ta humelela. O Xikwembu, ku ngari mina. Ndzi pfumeleli ndzi tshama na Rito ra Wena. Wa vona? Kumbexana ndzi nga hava ndzi ri loyi a nga pfumeriki loyi a ehleketa hi ku olova leswaku, 'Kunene, loko—loko... kunene, hikokwalaho ka yini hinkwavo ka vona va nga vuli tano?' Wa vona? A ndzi—

ndzi lavi ku fana na swona sweswo na swonavu. Ndzi lava kuva mupfumeri. Ndza swi lava. Ndza ri vona Rito ra Xikwembu ra awara. Ndza xi vona Xikwembu eka Rona. Kutani, Hosi, ndzi endli xiphemu xa Rito lero. Ndzi endli xiphemu xa Rito lero. Ndzi lava kuva xiphemu xa Rona.” Hosi yi ku katekisa.

³¹⁴ Sweswi a hi khongeleni. Nakona munhu un’wana na un’wana, a tikhongelela hi—hi yexe, kutani ndzi ya eku mi khongeleni. Xana a mi swi tiva, siku rin’wana hi ya eku... a hi ngavi swin’we lahawani, kumbexana, nkarhi wo leha nyana. Van’wana va hina va ta tekiwa, nakona a hi ngavi swin’we. Ku na votala va hina lahawani, laha, van’wana va hina va nga eku dyuhaleni. Van’wana va hina, a hi swi tivi. Hambi kuri lavantshwa va fa. Ha fa hi ri eka xiyimo xi n’wana na xin’wana xa ku kula. Hi fanele ku hambanyisiwa, nakona nchumu lowu wu fanele ku tshamisekisiwa. Nakona mi ngaka mi nga ngheni lahaya mi hlangananile, mi fanele ku ta mi ri emiehlekeweni yan’wina leyinene.

³¹⁵ Mi ri, “Kunene, loko ndzi nga se fa, loko a ndzo Ri vona.” Ee, mi nga swi endli sweswo. Swi nga ha endleka leswaku mi va mi ngari emiehlekeweni ya n’wina leyinene hi nkarhi wa kona. Mi nga ha dlayiwa mi nga se fika ekaya, ekhombyeni ra movha. Mi nga ha fa hi nhlaselo wa mbilu. A hi swi tivi leswaku ku ta humelela yini; i Xikwembu ntsena xi nga khoma sweswo. A ndzi tshembhi.

³¹⁶ Ndzi langutisile vanhu lava va nga le handle, hambi, va khomelerile mavoko ya vona efasitereni. Wa vona? Ina, Xikwembu xi katekisa.

³¹⁷ “Ndzi—ndzi lava—ndzi lava kuva loyi a lulameke. Ndzi—ndzi—ndzi lava kuva loyi a lulameke.” Kutani a hi swi lulamiseni, sweswi, kona sweswi. Ntsena, mi nga swi lulamisel a nkarhi wun’we; loko ku suka emakorhwени ya mbilu ya n’wina, loko hi ku tshembheka mi nga ku, “Hosi Yesu, swi ngari na mhaka leswaku i yini, kumbe leswi munhu un’wana a swi vulaka, Rito ra Wena ri tava ro sungula evuton’wini bya mina. Ndza Ri lava evuton’wini bya mina. Hi wena Rito. Bibele yi vule tano, na swona ndzi pfumela leswaku Bibele i Rito ra Xikwembu. Nakona ndza swi tiva leswaku mikhuva na tidyondzo ta kereke, leswi swi nga tlaveriwa endzeni ka Rona, swi ri endlile nyandza ya vukanganyisi. Hosi, ndzi basise ku suka eka swilo swo tani hi sweswo, kutani u ndzi pfumelela kuva wa Wena hi ku hetiseka. Ndzi tlakusela mavoko ya mina eka Wena. Ndzi tlakusela mbilu ya mina eka Wena, rito ra mina eka Wena, xikhongelo xa mina eka Wena. Xikwembu, ndzi tsetseleli.”

³¹⁸ Kutani mavoko ya mina ya le henhla, na wona, Hosi. Ndzi basise, O Hosi, eka ku kala ripfumelo hinkwako.

³¹⁹ Hambi loko A nga ndzi nyiki e—e Matimba yo famba ku kotisa Enok na kuva ndzi nga boheki ku fa, kambe ntsena teka

ku famba ka nindzhengha na kuya eKaya na Yena; kambe, Xikwembu, ndza pfumela leswaku swi ta humelela, hikuva ndza swi tiva leswaku ku tava na ku Vutliwa hi siku ra makumu, na swona ntirho wu ta tsemiwa wu koma.

³²⁰ Kutani, Tatana, sweswo ku vula khalendara ya hina, makume nharhu-ntsevu wa malembe man'wana nakona ntirho wu tava wu herile, kutani U ta fanelu ku vuya nkarhi wun'wana kwalahaya kumbe a ku nga tava na nyama ley i nga ta pona. Kutani ha byeriwa, hi vativi va khronoloji na e—na vanhu lava va lavisisaka swilo swo tani hi sweswo, leswi hi ku hetiseka hi nga le mahlweni ka swona hi xitalo, malembe yo tala ku suka eka sweswo, malembe yotala kuya le henhl; va hi byela, hi tikhalendara, leswaku hi le mahlweni ngopfu na sweswo; kumbexana kuna khume ntlhanu ntsena kumbe makume mbirhi wa malembe lawa ya nga sala. A ndzi swi tivi, Tatana. Kambe ndza swi tiva, hambi kuri kuya hi khalendara ya hina, hi le kusuhi na ku fika.

³²¹ Ndzi vona laha ku nga taka ku ngavi na ntshembho lowu salaka, Hosi. Ku le kuteni ka... Loko vo kala va sungula ku copana hi tibomo letiya, Hosi, ku ngaka ku—ku—ku ngavi na rivala ra nyimpi. Va ta, va ta herisana. Kutani, Hosi, ti le ku nembeleleni kwalahaya, nakona hambi swiri tano Bibebe yi vula leswaku matilo hinkwawo ya tava ya ri karhi ya pfurha. Xikwembu, ndzi vona awara yi ri karhi yi humelela.

³²² Ndzi ehleketa hi ku gevengiwa ka Presidente, kutani ndzi vona wanuna loyi un'wana wo biha a nghena, handle ko pfumelela wanuna a va na ku tengisiwa, kutani a n'wi balesela, eka ndlhayo wo chavisa. O Xikwembu, un'wana u na nandzu ku kota loyi un'wana. Va hava nfanelo yo endla sweswo. Vubihi eka rixaka ra hina, a hi fanele kuva hi ri rixaka ra Vukreste, hi xikombiso xo siwaneka njhani, Hosi, xa Vukreste. Hi rivalele, Hosi, eka swidyoho swa hina.

³²³ Hi pfune, O Xikwembu, ngopfu-ngopfu Kereke ya Wena, lava va nga khuvuriwa eka Miri luwa wo hlamarisa wa Kreste. Laha, "I Moya lowu hanyisaka," U vule tano. Nakona tani hiloko N'wana wa munhu u tlhandlukerile ehenhla, swingaleswi na Miri wa Yena wu ta tlhandlukela ehenhla. Kutani hi Yena Nhloko; Kereke ya Yena i Miri. O Xikwembu, i Nhloko ley i letelaka Miri. Pfumelela Vurhangeri bya Rito byi letela Miri wa Kreste. Nakona ingaku ndzi ngava xiphemu xa Miri walowo, Hosi.

³²⁴ Ndzi khongeleta lava va nga yimisa mavoko ya vona, na hinkwawo lava va nga kona na hinkwawo lava va nga tava eka tithepi. Hosi Xikwembu, ndzi khongela hi ku tshembheka. Va nghanise, Hosi. U langutisa timbilu ta vona. U tiva leswi va nga xiswona. Kambe, tani hi nandza wa Wena, ndza—ndza va

khongeleta vanhu lava, Hosi. Ndza—ndza va rhandza. Ndza va rhandza.

³²⁵ Nakona ndzi—ndzi—ndzi ringeta ku endla leswi hikuva ndzi twile leswaku xileriso xa Wena i kuva mina ndzi swi endla. Swingaleswi, Tatana, hi mina loyi, ndzi endlaka hilaha ndzi nga kotaka hakona hi . . . Rivalela swihoxo swa mina swo tsana, Hosi. Ndza khongela leswaku U ta—U ta ndzi nyika ntamu, leswaku ndzi ta kota ku swi endla swi va erivaleni swinene eka vanhu.

³²⁶ Sweswi u va na hina etabernakeleni, vusiku lebyi. Langutisa ehansi eka lava, Hosi, lava va nga yimisa mavoko ya vona etabernakeleni. Ndzi kambisise, O Hosi, nakona u ndzi ringa. Kutani loko ku ngava kuri na xihoxo eka mina, ndzi basise, Tatana. Hi nyike swona. Basisa kereke leyi.

³²⁷ Hi basise hinkwerhu, Hosi, leswaku Rito ri ta endliwa nyama exikarhi ka hina na kuva ri tivisiwa eka misava esikwini leri. Hi nyike swona, Tatana. Hikuva, ndzi nyikela leswi, hi mina n'winyi, na hi tsalwa leri, na hi vayingiseri lava, na hi Rito ra Wena na xitshembhiso xa Wena, eku ponisiweni ka mimoya ya hina, hi Vito ra Yesu Kreste. Hi nyike swona, Hosi.

³²⁸ Ingaku Matimba ya Xikwembu ya nga ta ehenhla ka hina kutani ya hi tota, ndlela hinkwayo ku sukela eka mufundhis kuya eka mulanguteri wa kereke, na munhu un'wana na un'wana loyi a nga kona. Ingaku Moya lowo Kwetsima wu nga ta wu ta teka ndhawu ya Wona endzeni ka timbilu ta hina, na ku teka xitshembhiso xin'wana na xin'wana xa Xikwembu na ku hi paluxela leswaku Rito ra Wena i Ntiyiso. Hi Vito ra Yesu ndza khongela.

³²⁹ Kutani loko ha ha korhamisile tinhloko ta hina. “Ndzi nga . . .” Ndzo lava muchayi wa ogene, loko a swi kota, ku hi nyika khodo eka risimu leri, “Ndzi twa Muponisi wa mina a ri eku vitaneni. Laha A ndzi yisaka kona ndzi ta landzela.” *Laha A Ndzi Yisaka Kona Ndzi Ta Landzela.*

. . . Muponisi wa mina a ri eku vitaneni, (Hi
Yena yini? I Rito!)

Ndzi twa Muponisi wa mina a ri eku vitaneni,
Ndzi twa Muponisi wa mina, (sweswi alani
tidyondzo ta n'wina na swilo)
Teka xihambano xa wena kutani u lan- . . .

³³⁰ “Loyi a nga taka a nga teki xihambano xa yena kutani a Ndzi landzela, Rito, a nga ringanelanga kuva mudyondzisiwa wa Mina.”

Laha A ndzi yisaka kona (ku tlhelela eBibeleni,
laha A nga ta mi yisa kona) . . . ta landzela,
Laha A ndzi yisaka kona ndzi ta landzela,

Laha A ndzi yisaka kona ndzi ta landzela,
 Ndzi ta . . . (Loko kuri kuya exidziveni, hi Vito
 ra Yena; loko kuri kuya e altarini, kuya susa
 tingana ta mina!) . . . ndlela hinkwayo.

³³¹ [Makwerhu Branhamma a sungula ku hama *Laha A Ndzi Yisaka Kona Ndzi Ta Landzela*—Muhleri.]

 . . . Yena eku avanyiseni, (Hi swona sweswo,
 sweswi.)
 Ndzi ta . . .

³³² Xana u le ka tlhelo rihi? Xana u vona yini eka xivoni xa wena
 eBibeleni, nghilazi ya Xikwembu yo langutisa hi yona, loko ndzi
 ri eku avanyisiweni sweswi hi Rito?

 Ndzi ta famba na . . .

³³³ “Ndzi ta famba na Rito, swi ngari na mhaka leswaku swi
 durha yini. Ndzi ya eka ku avanyisa ka Xikwembu. Loko
 ndzi fanele ku teka yin’wana ya tindhawu, ndzi endli ndzi va
 mupfumeri, kona kwala Ritweni.”

 . . . na Yena, na Yena ndlela hinkwayo.

 Hikuva laha A ndzi yisaka kona ndzi . . .

³³⁴ Sweswi ehleketa hi swona, hi vukheta sweswi. “U
 yisa . . .” 

TINXAKA TINHARHU TA VAPPUMERI TSO63-1124E
(Three Kinds Of Believers)

Hungu leri hi Makwerhu William Marrion Branham, ri sungurile ri hangalasiwa hi Xinghezi hi Sonto ni madyambu, Hukuri 24, 1963, eTabernakeleni ya Branham eJeffersonville, Indiana, U.S.A., ri tekiwile kusuka eka nkandziyiso wa thepi ya maginetiki kutani yi tsariwa yi nga khomananga hi Xinghezi. Hundzuluxo lowu wa Xitsonga wu tsariwile wu hangalasiwa hi Voice Of God Recordings.

XITSONGA

©2017 VGR, ALL RIGHTS RESERVED

VOICE OF GOD RECORDINGS, SOUTH AFRICA OFFICE
58 DISA ROAD, ADMIRAL'S PARK, GORDON'S BAY 7140 WESTERN CAPE
REPUBLIC OF SOUTH AFRICA

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Xitiviso Xa Mpumelelo Wo Kopa

Timfanelo hinkwato ti hlayisiwile. Buku leyi yi nga ha kandziyisiwa hi printara yale kaya leswaku munhu a ti tirhisela kumbe ku yi phakela, yi nga hakerisiwi, tani hi xitirhi xo hangalasa Evhangeli ya Yesu Kreste. Buku leyi a yi xavisiwi, yi humesiwa hi xikalo lexikulu, yi vekeriwa eka “website,” yi hlayisiwa eka tisisiteme leti ti nga swi kotaka kuva yi tekiwa, yi hundzuluxeriwa eka tindzimi tin’wana, kumbe yi tirhiseriwela eka nkwama lowu wu nga pfumeleriwa handle ka nhlamuselo leyi yi nga tsariwa ya ku pfumeleriwa hi Voice Of God Recordings®.

Vuxokoxoko byo tala kumbe nhundzu yin’wana leyi yi nga kona, mi komberiwa ku ti hlanganisa na:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org